

**Ubwo odada  
Bwuh  
Uhyeh-Ogba**



## UBWO ODADA BWUH UHYEH-OGBA

“UBWO ODADA BWUH UHYEH—OGBA” rih ala i-tu gwurwuh bwuh am bwuh aleh, bwuh epwu nya Upwu Igogo u-uhyeh nya ang imeje dati dati ilepwu nya Upwu Igogo ayidang. M mi onu yekee, Upwu Igogo ayidang ubwoomwu a rih upwu ole ko jé wule ela nya Oheh Oluhyeh jeh anginyi eheh gwu apwu ikila wuuh le.

Ela nya Oheh Oluhyeh bwuh “uhyeh-ogba.” Saji nya oowa le, o rih ang o-da ikiletu ile ká imih-enyih bala imih nya abwela onyiila ohoho nwu. Uka ká onginyi á ye iryah da, ko pe hih ihobiri wuuh la ohoho, ko wurwu Ongolahi la Jisos Krayist wepeu nyamwu, ko ka no epwa too e-epwu okiletu nyamwu lala Ongochida, Ongolahi la ka me ilomwu je Ongoowa yeeyee. Oowa le, o kaa chi ijih nya okekeni bala okpunyih olala ha okiletu nya ongo omimi lele. Ingiile ho e-epwu nya ohihi nyam nya ogbanye ogbanye la eka 1937. Bwuh uka oowa gbeeh daale le, m biri o-jih lawule nyam bala Ongolahi la ole-bi-ebi oowa enenehe leka. M juwa bileng ká ka hwuh ilong wuuh lepwu lepwu jwuh Ongolahi la Jisos Krayist u-ubwo, ya ilong chepetekee hoo, ó rih ká ho inyi leka aale.

— Watson Goodman (1920-2002)

# OHÁHA NYA OHEH OLUHYEH

Ala-Rom 5:8

Ma, Oheh Oluhyeah ayidang ti chi oháha olala otuka nyamwu ole ko la e-ega nyahi wuuh eheh le. Saji uka ole kahi juwa jijih e-epwu nya ihobiri ohoho nyahi wee le, Oheh Oluhyeah duh Krayist erwu wari kaka gbuh wonu nyahi jwuh.

Jon 13:1

Uka oowa, o hih lala uturwu ookpokpoh ká enu uturwu nya Ang Oririh Ochipwurwu nya ala-Juuh ka pwu ejih le. Uka owe, Jisos ayidang ti jé yekee, uka nya awa ole koowa nyi ka kpa rwu bwuh epwu nya odeheh ole, tiri ekpe ka ega nya Oheh Oluhyeah Adidowa nyi juwa jwuh chwee lume le. Angile ki rih anginyi nyamwu e-epwu nya odeheh ole le, i hoo lume. O la oháha oowa e-ega nyaa gbeeh jwuh ka obaba.

Owurwu Wurwu 1:5

Ká onahi bala okpunyih nya Jisos Krayist ongoale ko rih ibeenuh ochila o-hwuh okiletu ha nya Oheh Oluhyeah bala o-rih Onyi nya ogbanye ogbanye i-ilahi nya Oheh Oluhyeah ha angi gbugbuh ile wuuh ki wulejih bwuh la igwuh juwa hihi mími, bala o-rih adirahwu ogbahi nya alidirihwu il-odeheh ole wuuh a juwa tanu inyinyi me. Ahi ayidang há Jisos Krayist oowa lume. Inyi a duh ko kpa iwo nyamwu hwúuhi wuuh cherih cherih bwuh epwu nya ihobiri ihoho nyahi wuuh le.

Jon 3:16

Saji, alodeheh ole há Oheh Oluhyeah lume gbeeh ko duh Onyewe olookpokpoh nyamwu wari kaka gbuh wonu nyaa jwuh, saji ká ong mí ong ole ko mí loo le, á ka ta ayirejih kaka. Ma, ko ka la ohihi omími-ka.

Jeremaya 31:3

Ongolahi me ilomwu jem ugbeeneh. O bímh yekee, A hám lume okporih kporih gbéh oyih mí oyih le. Saji nya oowa le, ubwo onahi nyam, m kpa gbileng ba ilom le.

# JISOS KRAYIST RIH OHEH OLUHYEH

I Timoti 3:16

Umume okpibaa na erwu onyiila nya onginyi nya Oheh Oluhyeh oririh, ole kahi mi la jaabwo ká Oheh Oluhyeh bwuh choo eheh mejeehi, á jwuh iwee odada kpongh kpongh ka. Olegbejwuh nya erwu onyiila oowa jwuh abwuma nya onginyi eheh luka ko chi ilomwu eheh. Olegwuh Igogo chi okwurwu kwurwu nyamwu eheh mejeehi ahi anginyi eheh. Alegwuh erwu nya Oheh Oluhyeh kpa ehi nya ilaa ye ebi-ebi nyamwu. Anginyi nyamwu kpa erwu onyiila nyamwu kaka yah pye ka epwojah mi epwojah wuuh. Alepwojah la dati dati mi la enyi nyamwu odeheh ole. Oheh Oluhyeh kpoo ruw ka epwoohed lahi lahi.

Jon 14: 9, 10a

Jisos we bih o yekee, Filip, o rih ole kam hwee tanu, ang amale kaka le, o rih á mila jé ongole kam rih leka piyoo daale? Ong mi ong ole ko yem le, aale, ongoowa ye Oheh Oluhyeh Adida le. Eeh le, i-ye a ti duh ká mimi juwa yekee, Me ongole ká Oheh Oluhyeh Adida rih jeehi me, ti ti? Filip, o rih ahwu ayidang á mi yekee, am nyi juwa e-epwu nya Oheh Oluhyeh Adida, Oheh Oluhyeh Adida ayidang nyi titi jam e-epwu nyam am inyinyi ka?

Jon 1:1 bala 14

Bwuh omwu-omwu odada, Ela ole ko juwa hihi le, o juwa eneh-eneh le. Uka oowa, Ela oowa juwa ta Oheh Oluhyeh ayidang. Ela oowa a rih Oheh Oluhyeh le. . . . Ela o-hwuh ohihi nya Oheh Oluhyeh ha anginyi eheh oowa wari kaka rih onginyi eheh luka ole ki moo wari we epwu nya odeheh ole. O kwu ám e-epwu nya odeheh ole tahi. Uka oowa, ahi angile kahi juwa too le, ahi kpa ehi nyahi ye ebi-ebi nya ogboh otuka nyamwu. Ogboh otuka oowa a rih ang o-jwuh ejee yekee, owa ayidang kpongga nyaa rih Onyewe olookpokpoh nya Oheh Oluhyeh Adida lele. Ahi ye jaabwo ká ahyeerwerwa bala ela nya ilehi mi epwu nyamwu pweepwee uka oowa inyinyi.

## JISOS, ONYI NYA OHEH OLUHYEH

Ong mí ong ole ko yah da odeheh yekee, Jisos nyaa rih Onyewe nya Oheh Oluhyeheh inyilehi le, aale, Oheh Oluhyeheh juwa hihi e-epwu nya ongoowa le. Aale, ongoowa ayidang titi juwa hihi e-epwu nya Oheh Oluhyeheh inyinyi le.

—I Jon 4:15

Saji, e-epwu nya Krayist ole ki mama wari we odeheh ole lala onginyi eheh, umume olala bala ang mí ang nya ohihi nya Oheh Oluhyeheh ayidang wuuh a jih chi onu jira lele.

—Ala-Kolosi 2:9

I ma onyi hahi, i ti hwuh onyi ga hahi inyinyi. Ongiri o-kpa gbeh anginyi ka jih ugburwubwo nyamwu. I ka wurwu enyi nyamwu Ebi-ebi, Ongo mela je, Oheh Oluhyeheh Agwugwu, Adida Ogboyih mí Oyih, Onyadirahwu nya Okpunyih.

—Ayisaya 9:6

Olegwuh erwu owe we bih oo yekee, Meri, woh me! Olegwuh Igogo nya Oheh Oluhyeheh ka wari kaka hwu tang, ongiri nya Oheh Oluhyeheh Agwugwu ti ka chi kwurwung inyinyi! Saji nya oowa le, i ka wurwu onyi nyang oowa Onyi Oligogo. I ka wurwoo, Onyi nya Oheh Oluhyeheh ayidang inyinyi.

—Luk 1:35

Uka ká Pita juwa kpa ela oowa yah wee le, egbamwu nya ahigbooh otuka tuka ohe a chi kwurwaa iwa wuuh u-uwa lele. Uka oowa, omih ohe juwa yah ela bwuh epwu nya egbamwu oowa da odeheh yekee, Ongole a rih Onyewe olike-je nyam ole ko hám lume le. Ela mí ela nyamwu wuuh hám lume kaka kpoyeh. Le anu anginyi eheh, anú-u woh omih nyamwu me.

—Matiyu 17:5

Elewe rih o-ho jira nya ela ole ká Ongolahi Oheh Oluhyeheh yah bwuh onu nya olomwu nyamwu onyogoh yekee, Anu woh me, onyi onjwoh iyang ole ko jé oleng enenehe leka, ka jenyi. O ka ma onyi oleng. I ka wurwu enyi nya onyi oowa, Imanuel, ole ká etuh nya Imanuel rih Oheh Oluhyeheh jam e-epwariri nyahi.

—Matiyu 1:22, 23

# **JISOS YAH DA ODEHEH ONGOLE KÁ OWA AYIDANG RIH**

**Jon 11:25**

Jisos we bih oo yekee, Am kpakpakpa a rih owulejih bwuh la igwuh ayidang bala ohihi le! Ong mí ong ko mi lam le, ó ririh ko gbugbuh kpá, o ka mími wulejih bwuh la igwuh, juwa la ohihi okila.

**Jon 13:13**

Anu ayidang kaa wurwum Ayibahi iticha bala Ongolahi. Ole kanu kaa wurwu inyi le, anu jé yah, saji inyi, m rih inyilehi le.

**Jon 8:23**

Jisos we bih aa yekee, Anu ayidang rih alejih. Ma, am le, m ti bwuh uhyeh-ogba hirejih. Anu rih alodeheh ole. Ma, am ayidang le, m ti rih alodeheh ole tanu kponggh kponggh ka.

**Jon 9:5**

Saji ole kaam ayidang jam odeheh ole wee le, am kpa-kpakpa a rih otinikah o-hwuh ahigbooh nya ohihi nya Oheh Oluhyeh ha alodeheh lele.

**Jon 6:35**

Jisos we bih aa yekee, Am kpakpakpa a rih ikaa nya ohihi oowa lele. Ong mí ong ole ko wari we ega nyam le, aale, imih á ka nwoo kpá enenehe kaka. Ong mí ong ole ko ti kpa okiletu ookpokpoh mi lam le, aale, imih-enyih á ti ka nwoo kpá enenehe kaka inyinyi.

**Jon 8:58**

Jisos we bih aa yekee, Nya ilehi ilehi, m binuh yekee, eneh ki ka ma Ebrahim le, am ayidang juwa le.

**Jon 10:7**

Inyi, Jisos a mími bih aa yekee, Am kpakpakpa a rih onu ugbeyi o-bwuh ka ubeh nya ikpilo nya Oheh Oluhyeh le.

## UKWURWO ILEBI-EBI IHYE ILE KÁ JISOS HO

Matiyu 14:19-21

Uka oowa, Jisos bih alirwuh nya anginyi iwe wuuh yekee, Anu nyi hwuhwu beebie u-uhye nya ame iwe me. Oowa le, o hwuh abe nya ikaa irwu iwe bala ienyih imiye iwa le, o hwuh ehi nyamwu hwaa riri ka epwooh le, o jih Oheh Oluhye obeh e-epwu nya abwo oriri le, o gwuh ikaa iwa eneh le, o goh aa ha angijugbeyi nyamwu lele. Inyi, angijugbeyi nyamwu iwe a titi yeh kpa keleh kila alirwuh nya anginyi iwe wuuh lele. Uka ká alirwuh nya angiiwa wuuh rih ang oririh oowa wuh epwu le, angijugbeyi nya Jisos a goh apwu nya ikaa bala ienyih ihiih iwa mi edoh iwoh kwurwu imiye lele. Irwuh ojwujwuh nya aleng igbahi ile-pwu nya alirwuh nya anginyi iwa la anginyi ang uno iwoh kwurwu imiye da anginyi ang ohwuh iwoh chiririh. Ma, i ti wa anyang bala anyi anjwoh ichicheh jwuh laa kpong kpong ka.

Luk 5:5, 6

Sayimon we bih oo yekee, Ayibahi eeh! Ino, ahi ye akama nya ilehi ilehi loduh-oduh gbeeh ká ahi pye le, áhi wuh ing-ingiye kpong kpong ka. Ma, bwuh la ela oyayah olonu nyang, m ka da ugbowu oowa jaabwo ká yah le! Inyi, uka ki keleh kaka da ugbowu nyaa u-uwa inyilehi le, i wuh irwuh nya ienyih mi ugbowu nyaa kpong kpong lala o-rih-ekke, ugbowu nyaa iwa nyaa ka gwuh eneh hih awule lele.

Matiyu 20:30 bala 34

Oowa le, aliduh imiye ihye ile ki hwuhwu u-ugbeyi oowa a woh ojah yekee, Jisos nyi juwa chipwurwu kam le, i juwa yah ela la omih ogbooh yekee, Ayibahi, ahwu onyi nya Devidi, chwuchwuuh yehi ahyeerwerwa chee me! . . . Inyi le, aliduh iwe a la Jisos ahyeerwerwa lume le, o keleh kaka yu-bwo nyamwu gwuh aa egbahi nyaa lele. Oowa le, i jé juwa yoyi i-ijata ijata le, i juwa ba Jisos je lele.

## **JISOS KRAYIST RIH ONGO HO ANG WUUH BALA ONGOLAH I LA**

**Ala-Kolosi 1:16**

Saji, bwuh epwutubwo nya Krayist oowa ayidang, Oheh Oluhye a ho ang mi ang wuuh ile ki juwa e-epwooh bala ile ki jam odeh ole wuuh tu ang mi ang ile ki jé-e yeye e-ehi bala ile ki jé-e yeye e-ehi kaka wuuh le. Ó rih ká ang iwa á rih echi adirahwu ririh, leeh, o-rih ayibaba o-jih uhyeh nya ang i kila wuuh wewe, leeh, o-rih alegbejwuh inyingiri wewe, leeh, o-rih alegbejwuh igbejih nya anginyi eheh, leeh, alegwuh erwu wewe, aale, ang mi ang iwa wuuh ile ká Oheh Oluhye hoho le, i bwuh epwutubwo nya Krayist wuuh. Krayist oowa ayidang kpangga, Oheh Oluhye a ti ho ang iwe wuuh ha inyinyi lele.

**Ala-Hiburuh 1:2**

Ma, luka o-hih ekpe-ekpe olelee le, Oheh Oluhye yah ela ta anginyi eheh bwuh onu nya Onyewe nyamwu le. Onyewe oowa kpangga. Oheh Oluhye a chwu ko ka rih ongo rih ugwu nya ang mi ang ile wuuh ká Oheh Oluhye hoho lele. Bwuh la Onyewe oowa ayidang, Oheh Oluhye a ti ho odeh ole inyinyi le.

**Ala-Rom 14:9**

Saji, Krayist wari kaka gbuh bala owulejih bwuh la igwuh mimi juwa hihi, saji ko ka jé-e bwuh la oowa rih Ayibaba nya ang i gbugbuh wuuh, bala ang i juwa hihi wuuh inyinyi!

**Jon 1:3**

Ang mi ang ole wuuh ká Oheh Oluhye ho bwuh omwu odada le, O haa bwuh la Ela nya ohihi oowa. Upile nya ingingihye á juwa ole ká Oheh Oluhye ho e-ekpe nya Ela oowa kpong kpong ka.

**Ukwurwo Nya Alerwu 2:36**

Inyi, Pita a mimi bih aa yekee, Anu woh me! Anu ala-Isirel wuuh, anu jé nya ilehi ilehi leelee me. Jisos ongole kanu wuh kpa kaka gwuh iloo ba okojih le, owa kpa-kpakpa, Oheh Oluhye a chwu, hwuh oo nya Ongolahi la bala Krayist nyahi wuuh lele.



# **JISOS KRAYIST A RIH AGABA IDUH OLE KO KA LA ANGINYI EHEH WUUH EJEH UKA O-HIH EKPE LE**

## **Ala-Rom 14:10**

Eeh le, ahwu ongole ká wee ya ejeh wuh onyadang okila e-epwu nya Krayist le, i-ye a tí duh ká juwa ho inyi? Ahwu ongole ká ti wee ya ehi da onyadang okila e-epwu nya Krayist bweeh le, i-ye a ti ká juwa ho inyi inyinyi? Saji, ahi angi mimi wuuh juwa ka keleh kaka godayi riri i-ilahi nya echi adirahwu olejeh nya Oheh Oluhyeh piih.

## **Matiyu 25:32**

Uka oowa, alepwojah mi epwojah nya odeheh ole wuuh ka keleh kaka jira i-ilahi nyamwu. Oowa le, owa ayidang a ka chaa ebwoh imiyyeh lala ongo gbek ikpilo a chi ikpilo nyamwu ebwoh hih imwu embirih nyamwu lele.

## **Ala-Rom 2:16**

Le, iryah o-la onginyi ejeh olepwo okiletu nya anginyi eheh owe kpannga, a ka rih ibeenuh nya ang mi ang ole ká ong mi ong jam ho ibaa-ibaa odeheh ole u-uwa i-ilahi nya Oheh Oluhyeh la enu uturwu nya ejeh nyamwu ole ko ka la bwuh la Krayist Jisos inyinyi, jaabwo kam kaa yah da odeheh e-epwu nya erwu onyiila o-yah pye nyam ole inyinyi lele.

## **II Timoti 4:1**

Timoti, m jam dang ehileh i-ilahi nya Oheh Oluhyeh bala ilahi nya Krayist Jisos Ongo ka la anginyi ihihi bala angi gbugbuh ejeh luka ole ko ka wari bala ipi adirahwu nyamwu.

## **Ukwurwo Nya Alerwu 10:42**

Inyi, Jisos oowa ayidang a dahi ehileh yekee, ahi nyi kpa erwu onyiila ole kaka yah pye jeh anginyi eheh wuuh me. Kaahi nyi mimi juwa rih ibeenuh yah jeh alodeheh wuuh yekee, Jisos oowa kpakpakpa a rih ongole ká Oheh Oluhyeh chwu, ko ka rih ongo la anginyi ihihi bala angi gbugbuh wuuh ejeh lele.

# **JISOS KRAYIST UBWOOMWU A KAA CHI ANGINYI EHEH DA LE**

**Ala-Hiburuh 7:25**

Inyi a duh ká Jisos oowa la ongiri uka wuuh nya o-ka hwuh ochida ha angile wuuh ki ka mi-i keleh ka ega nya Oheh Oluhyeh hwuh loo mi jaabwo mi abwo ki jwuh irwuh kaka ba lele. Saji, jaabwo ká Jisos oowa juwa hihi piyoo lele, o juwa i-ijata nya Oheh Oluhyeh, juwa biloo wonu nyahi ahi angi mimi wuuh jwuh uka mi uka le.

**Ukwurwo Nya Alerwu 4:12**

Ochida nya Oheh Oluhyeh á ti juwa hahi ahi anginyi eheh la ugbeyi okila ololohe dala o-bwuh la enyi nya Jisos Krayist owe kaka. Saji, enyi okila ololohe á juwa ole ká Oheh Oluhyeh hwuh ha ongongohe e-ekpelejih nya enu ole, kahi ka jé-e bwuh loo, chida mi kpong kpong kaka. Kene kene, ongiri nya enyi nya Jisos ubwoomwu me inyí!

**Jon 10:9**

Am kpakpakpa a rih onu ugbeyi o-bwuh ka ubeh nya ikpilo nya Oheh Oluhyeh oowa lele. Le, ong mi ong ole ko ka mi-i bwuh ega nyam jwu keleh ka ubeh nya ikpilo oowa le, aale, o ka chida le. Aale, ongoowa ka la ongiri juwa jwu bwuh onang nya ubeh oowa kpeheh bala o-jwu ka epwang, ka juwa tito nya ang orrih jaabwo ko hoo kaka ba mi inyinyi le.

**Jon 14:6**

Jisos we bih oo yekee, Am kpakpakpa a rih Ugbeyi oowa le. Am kpakpakpa a rih Ela nya Ihehi le. Am kpakpakpa a ti rih Ohihi ayidang inyinyi lele. Ongongohe á juwa ole ko ka jé-e pwu ega nya Oheh Oluhyeh Adida mi kaka. Kene kene, ó rih ká ongoowa á bwuh ega nyam eneh le me inyí.

**Jon 8:24**

Inyi a duh kaam ayidang binuh yekee, anu ka gbuh e-epwu nya ihobiri ihoho nyanu iwe piih lele. Anu ti ka gbuh la ihobiri iwa inyilehi, ó rih kaanu ayidang á mi mi yekee, am kpakpakpa nyaa rih, Amkpaa oowa, inyilehi lele ka.

# **JISOS KRAYIST UBWOOMWU A KAA CHI ANGINYI EHEH DA LE**

**Ala-Kolosi 1:12-14**

Anú-u juwa jih Oheh Oluhyeh Adida olepwoohéh obéh uka mí uka saji nya ole ko ho kaahi bala anu angí mí loo wuuh rih angí chila chila, nya o-ka la ebwoh ohe nya ang ugwhu nya ahi owawa nya Oheh Oluhyeh ole ko nwula no gbéh angí igogo nyamwu wuuh ilepwu nya ahigbooh nya Oheh Oluhyeh me. Oheh Oluhyeh ayidang gbahi kpehéh bwuh epwu nya o-rih onyohi nya ongiri nya ukpowuh le, Oheh Oluhyeh á kpahi keleh kaka jwuh ka epwu nya ohihi nya ipi adirahwu nya Onyewe nyamwu ole ko hoo lume lele. Onyewe nya Oheh Oluhyeh oowa ayidang a rih ongole ko kpa iwo nyamwu ra ihíh nya ochida nya Oheh Oluhyeh hahi, duh ká Oheh Oluhyeh hinyo híh ihobiri ihoho nyahi wuuh hahi le.

**Luk 19:10**

Saji am Onyi nya onginyi eheh ole wari we odehéh ole kaka pilahi nya angile kí hwahi híh ugbeýi nya Oheh Oluhyeh kam ka chaa da bwuh epwu nya ihobiri ihoho nya wuuh inyinyi.

**I Ala-Korinti 1:30**

Oheh Oluhyeh oowa kpangga a rih egbejwuh nya emwu-enyih nya ohihi ole kanu la bwuh la Krayist Jisos le! Saji Krayist oowa kpangga. Oheh Oluhyeh a ho ko ka rih emwu-enyih nya ela ojéje nyahi lele. Owa a ti rih emwu-enyih nya abwela onyiila nyahi, bala inya ocherih cherih olala i-ilahi nya Oheh Oluhyeh, bala ochida olala nyahi inyinyi lele.

**Tayitos 2:14**

Krayist oowa a hwuh ohihi nyamwu kila iyah wonu nyahi jwuh, saji ko ka gbahi kpehéh bwuh epwu nya ang inyibih ihoho nyahi wuuh, bala o-hwú ohihi nyahi cherih cherih saji kahi ka jé-e rih anginyi nyamwu ubwoomwu kemh, bala o-ka rih angí juwa kpa ongiri nyahi wuuh ho ukwurwo onyiila kemh inyinyi lele.

## IWO NYA JISOS A NWU URIH NYA IHOBIRI LE

Leelee, jabwo ká Oheh Oluhyeh ya ejeh owuwuh u-uhyeh nya ohobiri ohoho ruuhi ahi angi mimi i-ilahi nyamwu bwuh la iwo nya Krayist ole ko ya ye hwurwu saji nyahi we lele, o titi la gbadaa inyinyi yekee, ahi ka beh hih agbama nya Oheh Oluhyeh ole ko juwa ka wurwuh jahi da angihobiri piih i-ilahi inyinyi le. —Ala-Rom 5:9

### Ala-Efesos 1:7

Bwuh la Krayist oowa, ahi la ochida nya Oheh Oluhyeh, ole ká Krayist kpa iwo nya ilomwu ra ihih nyamwu wonu nyahi jwuh lele. Inyi a duh ká Oheh Oluhyeh hinyo hih ihobiri nyahi wuuh hahi bwuh la udu nya onahi ochakwu chakwu otuka nya Oheh Oluhyeh e-ega nyahi wuuh le.

### I Pita 1:18, 19

Anu la ilonu jé yekee, Oheh Oluhyeh ranu rara ha ilomwu, bwuh la ole ko gbanu kpeheh bwuh epwu nya agbayi nya ang inyibih ihoho ile kanu yeh bwuh epwutubwo nya adanu anyi le. U-uma nya ang ile ki kaa biri biri mí ilodeheh ole lala okpokoh onyoowurwuh, leeh, okpokoh igom, Oheh Oluhyeh a ti kpa ranu ha ilomwu ka. Ma, iwo olinya otuka nya Krayist ole ko lala Onyi okpilo ole ko la abi okpukpu nya ang onyobih ololohe ka, leeh, o-da ukpurwuh kponggh kponggh ka inyi!

### Ala-Hiburuh 9:14

Anyanyi, anu ti meh iryah ká irih olala nya iwo nya Krayist oowa ayidang ti ti ka la ongiri kaka ba e-epwu nya o-ka hwú iryah o-la onginyi ejeh olepwu nyahi kpenggh kpenggh bwuh epwu nya ukwurwo inyibih nya ihobiri i-jwuh apyobwunah-ka ihoho nyahi wuuh, saji kahi ka jé-e juwa hihi e-epwu nya erwu omimi ha Oheh Oluhyeh mí kaka ba? Ang odudah ká iwo nya Krayist rih ang olirih lume olinyi rih-ekee, owa ayidang hwuh ilomwu kaka kila iyah okpeekpee ha Oheh Oluhyeh bwuh la ongiri nya Olegwuh Igogo ongo juwa hihi gbesh oyih mí oyih, inyi a duh le!

## **OCHIDA JIH BWUH LA O-MI LA KRAYIST**

**Ala-Efesos 2:8, 9**

Onahi ogahi ododuh nya Oheh Oluhyeh, Oheh Oluhyeh a kpa chinu da luka ole kanu mi la ela nyamwu le. Oowa á ti bwuh la ingingihye ole kanu ho lubwo nya ilonu kponggh kponggh ka. Saji, ogahi onahi nya Oheh Oluhyeh kemh, o rih le. Ochida nyanu oowa, á rih urih oyeyeh nya ukwurwo ohoho nyanu ka, le, ongongohe á ka jé-e kpa chi ogwuh kponggh kponggh ka.

**Ala-Rom 5:1**

Saji nya oowa le, jaabwo ká Oheh Oluhyeh ya ejeh owuwuh nya ohobiri ohoho nyahi rwuhi bwuh la omimi olala lele, ahi la okpunyih e-ega nya Oheh Oluhyeh leele bwuh la Ongolahi Jisos Krayist le.

**I Jon 5:4**

Saji, ong mí ong ole ko rih onyi nya Oheh Oluhyeh nya ilehi ilehi le, aale, o ka la ongiri o-kpa kwurwu ang onyobih nya odeheh ole mi le. Ang ole kahi kaa kpa kwurwu odeheh inyi mí rih omimi olala nyahi e-ega nya Ohehe Oluhyeh.

**Jon 20:31**

Ma, ukwurwo ebi-ebi ile ki da kpeheh e-epwu nya upwu ole le, i daa kpeheh, saji kaahwu ongo wa upwu ole ka jé-e mi yekee, Jisos kpakpakpa nyaa rih Krayist Onyewe nya Oheh Oluhyeh oowa inyilehi lele. Saji ká omimi olala nyang oowa ka ho ká ka la ohihi omimi-ka bwuh la enyi nya Jisos.

**Jon 6:28-29**

Inyi, angiiwa a too ito yekee, Ayibahi iticha, i-iye a ti chila kahi ka ho piih ko ka meje ukwurwo nya Oheh Oluhyeh ohoho me? Jisos we bih aa yekee, Ukwurwo nya Oheh Oluhyeh ohoho a lee lele: Anu kpa okiletu nyanu wuh mi la Onyewe nya Oheh Oluhyeh ole ká Oheh Oluhyeh duh wari we odeheh ole me.

# AHYEERWERWA NYA OHEH OLUHYEH

Ejeh Onyiila 103:11

Jaabwo ká epwooheh jih lurwu piipiih hih ipi wee, inyinyi, ahyeerwerwa nya Oheh Oluhyehe a lume e-ega nya angile ki jwuh uhih nyamwu le.

Ejeh Onyiila 103:17

Ahyeerwerwa nya Ongolahi la, domwu bwuh orogoh orogoh, mimi juwa gbeh oyih mí oyih e-ega nya angile ki jwuh uhih nyamwu. O-la kpakpa nyamwu ti juwa e-ega nya ugbiyegwuh nyaa gbeh oyih mí oyih.

Mayika 7:18

O-owoh a tí rih Oheh Oluhyehe dala Ahwu, ko ka jé-e pe hih ihobiri ohoho bala o-ye abwela i-pipi nya anginyi nyamwu ba ejih inyi? Ó ka kpa eje owuwu tahi nyamwu o-okiletu gbeh oyih mí oyih ka, saji ahyeerwerwa oyeye hoo lume.

Eje Onyiila 108:4

Ahyeerwerwa oyeye nyang lume gwu o-bwuh odeheh ka epwooheh. Ela ilehi nyang ti la uhyeh kaka wuh egbamwu oyi inyinyi.

Idah Ojejehe 3:22, 23

Oheh oluhyehe á tahi ayirejih ka, saji nya ole kahi loo ahyeerwerwa. Ahyeerwerwa nyamwu á ti kaa bah ka. Ene-neenu, o kaa rih onyeeweh onyeeweh. Ela ilehi nyang lume!

Tayitos 3:5

O chihi da bwuh epwu nyaa wuuh lele. Ma, ochida oowa á rih inyahi, saji nya ingingihye ole kahi kpa abwela onyiila nya ilohi ho eneh kponghe kponghe ka. Ma, ahyeerwerwa nya Oheh Oluhyehe kemh, o kpa chihi da le. Ahi la ochida oowa luka ole ká Olegwuh Igogo nya Oheh Oluhyehe hwúuhi cherih cherih bwuh la o-ya o-nwu ma onyeeweh bala ohihi onyeeweh nya Oheh Oluhyehe hahi.

# OHEH OLUHYEH JUWA BEH EKO WURWUHI KA EGA NYA ILOMWU

Matiyu 11:28

Uka oowa, Jisos yekee, Anu kewe we ega nyam, anu angile wuuh kanu wee kpa ilonu da rwuh la ukwurwo nya oloh nya okilekwuh okpakpa bala ayiih obwobwo, m ka ya omwiinyo ha ugboduh okpukpurwuh nyanu.

Owurwu Wurwu 22:17

Uka oowa, Olegwuh Igogo nya Oheh Oluhye bala ahwu nya Onyi okpilo nya Oheh Oluhye yah da odeh yekee, Eeh, kewe me! Ong mi ong ole wuuh ko woh ela oowa, a titi yah inyinyi yekee, Eeh, kewe me! Ong mi ong ole wuuh ka imih-enyih á juwa nwoo bala ong mi ong ole wuuh ko hóo le, aale, ongoowa a kewe we ega nya Onyewe nya Oheh Oluhye nya o-ka yah enyih nya ohihi nwa la o-ka nwu urih nyamwu nwu eneh kaka me.

Jon 7:37

Inyi, enu uturwu o-hih ekpe-ekpe nya ojira jira nya ang oririh oowa ole ko baba gwu enu uturwu ikila wuuh a wari lele. Inyi, Jisos a wulejih godayi koko enu uturwu oowa le, o juwa yah ela gbooh da odeh yekee, Anu anginyi wuuh, anu woh me! Ong mi ong ole ka imih-enyih á juwa nwoo le, aale, ongoowa a wari we ega nyam kaka yeh enyih nya ohihi nwa me.

Ayisaya 55:1

Anu woh me! Ongole ka imih-enyih á nwu le, aale, a kewe we ega ka enyih jih me. Ongole ko ti la okpokoh kpong kpong ka, a kewe kaka ra ang ko rih. Eeh, kewe kaka ra ang onwanwa bala enyih eme labwabwo. Inya á juwa ka.

Ayisaya 1:18

Ongolahi la yekee, Anu kewe kahi ya egbejwuh keh awule kahi meh obih me. O rih ka ihobiri nyang á la monyooh la abilaala, i ka ye la owurwuh lala ara, i ti la omila lala egbu wewe, i ka yeda lala owuh onyoowurwuh.

## A-ANGINYI WUUH A RIH ANYI NYA OHEH OLUHYEH KA

Ala-Rom 8:14, 15

Saji, angile wuuh ki mi juwa ba iryah nya Olegwuh nya Oheh Oluhyeh olepuw nyaa je e-epwu nya ohihi nyaa wuuh kemh, a rih anyi nya Oheh Oluhyeh ile ki rih angigbahi e-epwu nya ela nyamwu wee le. Saji, Olegwuh nya Oheh Oluhyeh ole ko ya hanu le, ó rih Olegwuh o-kpanu jwuh ka epwu nya onyohi oririh ole kanu ka tiri ekpe mími ka epwu nya uhíh ojwujwuh kaka. Ma, Olegwuh oowa ole kanu yeh, rih Olegwuh ole ko kaa hwuh iwèh ahwurwu nya anyi igbahi oririh i-ilahi nya Oheh Oluhyeh ha angí mími. Inyi a duh kaahi angí ilinyi wuuh kaa la ongiri, juwa wurwu Oheh Oluhyeh yekee, Adada, Oheh Oluhyeh Adida nyam mí bwuh la ongiri nya Olegwuh Igogo oowa lele.

Ala-Filipayi 2:15

Saji kanu ka jé-e rih angí la abi ololohe ka, bala o-rih angí ho ingingihye onyobih kpongkpong kaka, lala anyi ikpeekpee nya Oheh Oluhyeh ile ki da ukpurwuh onyobih ololohe kaka e-epwu nya odeheh onyobih okwurwa kwurwa a-abwela ole ká anginyi ilepuw nyamwu rih anginyi inyibih, i-pi ela nya ilehi anyokoh me. Saji ká abwela onyiila ohoho nyanu ka juwa wurwuh lala ahigbooh ha alodeheh iíwa me.

II Ala-Korinti 6:17, 18

Saji nya oowa le, anu gba kpeheh bwuh epwu nya angí jém Am Oheh Oluhyeh jé-ka, kanu chi ebwoh datí ham me. Inyi, Ongolahi a yah le. Anu yubwo nyanu gwuh ingingihye ole ko chíri i-ilahi nyam Am Oheh Oluhyeh ka. Ó rih kanu mí ho inyi le, aale, M titi ka yenuh baje ha ilom lele. Oowa le, Am Oheh Oluhyeh a ka rih Adanu lele. Oowa le, anu titi ka rih anyi aleng bala anyi anyang nyam inyinyi lele. Inyi, Ongolahi Agwugwu otuka a yah le.

Ma, ong mí ong ole wuuh ko ka kpa okiletu ookpokpoh yeh Ela nya ohihi oowa bala o-mi la enyi nyamwu yeeyee le, aale, o ka ya ongiri ha angíiwa wuuh ki ka ye rih anyi ilam ilam nya Oheh Oluhyeh le.

—Jon 1:12



# ALA ILE KÁ OHEH OLUHYEH YAH U-UHYEH NYA EREH ONYOONGIRI

Ala-Galetiya 5:19-21

Ang ile ká imih nya ugbinyiro kaa kpa onginyi eheh kaka ho la gedeh gedeh. Iwa a lee le: Uya ohoho, owurwuh olala-ka a-abwela, ohihi nya uhilah olala e-epwu nya ang onyobih ohoho, ihyeh ijigah okpukpu wuuh, uhwa ojwujwuh wuuh, ujih mí ujih ojwujwuh wuuh, ela omwomwo wuuh, ijijih onyobih olala wuuh, agbama ojwujwuh wuuh, ang nya ilong ilong o-háng há kemh, onginyi ongo okila omimi-ka wuuh, olegwuh nya ebwoh ochichi olala wuuh, imaje nya ang nya onginyi okila olala wuuh, ereh onwanwa juwa ya, ojira jira nya uya oyaya onyobih juwa rih ang oririh okombah wuuh, bala uma nya ang inyibih ikila ihobo iliwe wuuh. Jaabwo kam danu ona u-uhyeh nya ang iliwe eneh-eneh le, m mími jam danu ona leele yekee, ong mí ong ole ko juwa ho ang itipyo i-lala iliwe wuuh á ka jé-e rih ugwuh nya ipi adirahwu nya Oheh Oluhyeh kpong kpong kaka.

Ayisaya 5:11

Iyoo otuka otuka a juwa ha angile ki chahi luturwu gbegbegbeh domwu nya ereh onwanwa gbeeh ká oduh ka hih, la ereh juwa yaa inyinyi!

Anu cherih kahi juwa ho abwela onyiila okpeekpee o-pwokwuh lala angile ki juwa e-epwu nya ahigbooh nya ahi opyepye nya ohihi nya Oheh Oluhyeh me. Le, anu tutum mi kahi juwa la ojira jira nya uya oyaya onyobih ole ki kaa juwa rih ang oririh okombah u-uwa kaka, leeh, o-ka juwa nwa ereh ya kaka. Leeh, o-juwa la ohihi nya uhilah nya uya ohoho ka, leeh, o-juwa la uhilah nya ang inyibih ikila ohoho kaka inyinyi. Leeh, o-juwa mwo ela ta angi ikila ka, leeh, o-juwa la ijijih onyobih kaka inyinyi. Ma, okoko nya oowa le, anú-u tutu juwa da abwela onyiila ohoho nya Ongolahi Jisos Krayist kwurwu ilonu wurwumh kemh me. Anu mi kanu ya ega da ha imih nya ugbinyiro nyanu, juwa ho ang ole ká imih nya inyiro oowa ka binuh yah, nyi ho me, kpong kpong kaka.

—Ala-Rom 13:13, 14

## ELA O-HO KPAKPA KEMH, Á NWA LEKA

Matiyu 22:37, 38

Jisos we bih o yekee, Ongolahi Oheh Oluhyeh nyang ka háng nya ilehi ilehi bwuh epwu nya okiletu nyang wuuh, bwuh epwu nya ugboduh okpukpurwuh nyang wuuh, bala o-bwuh epwu nya iryah omemeh nyang wuuh inyinyi. Ehileh owe kpangga a rih ehileh o-kwu-ilahi wuuh bala ehileh ole ko baba kpá gwu ehileh nya Oheh Oluhyeh ikila wuuh lele.

Mak 10:17-22

Uka ká Jisos juwa rwu bwuh ega oowa, oleng ohe keleh kaka ya arwuu nyamwu kwu ejih i-ilahi nya Jisos bih oo yekee, Ayibahi iticha onyiila, i-ye, m tí ka ho piih, eneh kam ka la ohihi omími-ka? Jisos we bih oo yekee, I-ye a tí duh ká juwa wurwum Ongolahi onyiila eneh? Ongongohe á rih onginyi onyiila kponggh kponggh ka. Kene kene, Oheh Oluhyeh ubwoomwu me inyi! Jisos mími bih oo yekee, A tí jé ehileh nya Oheh Oluhyeh ile ki da u-Upwu Igogo eneh-eneh le. Iwa lee le: A nwu onginyi ka. A da ela-ahwu, leeh, o-ho uya ka. A yoyih ka. A rih ibeenuh onookila ka. A ho onginyi rih ka. Jwuh ihih nya adang bala inang. Oowa le, onyi oleng owe, a we bih Jisos yekee, Ayibahi iticha, ingiwe wuuh rih ingiile kaam ayidang kaa ho eneh-eneh bwuh en-jwoh enjwoh nyam le! Inyi, Jisos a kpa ehi nya oháha mwuurwu ye oleng owe ching le, o bih oo yekee, Oligwuh nyam, ingihye ookpokpoh hih hang wee! Keleh ka epwa, ká goh ang mí ang nyang wuuh ra, ká ya okpokpoh nyamwu ga ha alikpehikah me. Aale, a ka la udu olepwoohed le. Ká kewe kaka bam je me. Oowa le, oleng owe a pi ahi kpanya kpanya juwa yegirih rwu la ayiiijih otuka otuka o-oluhyeh nya elewe ká Jisos bih oo lele. Saji owa ayidang kpu udu lume kaka kpoyeh.

Etuh 16:25

Ugbeyi ohe jih ole koo meh onginyi ehed lala ugbeyi onyiila. Ma, o-obaba nyamwu, agbeyi nya igwuh a jih le.

## A MI KI PIRING KA

Anu mi ká ongongohe a juwa kpa ela o-jwuh apyobwunah-ka ololohe hwunu ahi kooh! Saji u-uhyeh nya ang i-hih deejih ilinyi wuuh a duh ká agbama otuka nya Oheh Oluhyeh juwa ka wurwuh jahi da angile wuuh ki rih angi kaa jwuh ihih nya Oheh Oluhyeh kpongh kpongh ka piih lele.

—Ala-Efesos 5:6

Leeh, ánú tí jé yekee, angi ho abwela onyobih wuuh nyaa rih angile kii nyí ka jé-e jih epwu nya ogwuh nya angi ka rih ugwuh nya ipi adirahwu nya Oheh Oluhyeh kpongh kpongh ka le ka? Anu mi ki piriinu jwuh kooh! Angile ki rih angi juwa ho uya wuuh, leeh, angi juwa kpú ijigah wuuh, leeh, angi juwa da ela-ahwu wuuh, leeh, aleng ile ki kaa juwa ho uya ta aleng aanaa wuuh, leeh, angi rih aleyih wuuh, leeh, angi rih alimaje wuuh, leeh, angi rih angi nwa ereh juwa ya wuuh, leeh, angi rih angi juwa doh anginyi idoh wuuh, leeh, angi rih alagburwu wuuh le, aale, i ka jé-e rih ugwuh nya ipi adirahwu nya Oheh Oluhyeh mi kpongh kpongh kaka!

—I Ala-Korinti 6:9, 10

Anu cherih kanu rih angi woh erwu onyiila nya Oheh Oluhyeh wowoh kemh ka. Ma, okoko nya oowa le, anu rih angi juwa ho ela oowa ho me. Saji, ó rih inyi ka, tubwo aale, anu juwa pri ilonu jwuh ododuh titi wee.

—Jemsi 1:22

Anu anyi anjwoh nyam, anu mi ká ongongohe a piriinu jwuh kooh! Ong mí ong ole ko juwa ho abwela onyiila, aale, ongoowa a rih olabwela onyiila jaabwo ká Krayist ayidang rih olabwela onyiila le. Ong mí ong ole ko juwa hihi ka ilahi ilahi e-epwu nya ohobiri ohoho wee, aale, onyi nya oheh onyobih ayidang, ongoowa a rih le. Saji ohobiri ohoho a rih ukwurwo nya oheh onyobih bwuh omwu odada le.

—I Jon 3:7, 8a

Anu woh me! Ongongohe ole ko juwa kpa ilomwu ka uhyeh gwu iwew ahwurwu nya ilomwu, uka ole ko ti rih ing-ingihye ka, aale, ongoowa juwa piri ilomwu jwuh ododuh wee.

—Ala-Galetiya 6:3

## OHOBIRI KPA IGWUH WEJIH

Ala-Rom 5:12

Ohobiri jwu wari we epwu nya odeheh ole bwuh la oleng ookpokpoh. Oowa le, ohobiri nyamwu oowa a kpa igwuh ogbugbuh jwu wari inyinyi lele. Inyi a duh, ká igwuh ogbugbuh oowa chi kila anginyi eheh wuuh lee lele. Saji anginyi eheh wuuh rih angihobiri.

Jemsi 1:15

Uka ká enyi ojeje nya ehyang nya ang onyobih ohoho oowa a wuh epwu le, ongoowa a kaa ya ma ohobiri ohoho lele. Uka ká ohobiri ohoho oowa á ti juwa nwa ka ilahi ilahi gbeeh, ko pwu achinegeh le, o-yah da odeheh nyamwu a kaa rih igwuh ogbugbuh lele.

Ala-Rom 8:6

Iryah nya ang nya imih nya ugbinyiro ilinyi kemh omemeh kaa kpa igwuh ogbugbuh kila onginyi eheh! Ma, apyobwunah nya o-ba iryah nya Olegwuh Igogo je kemh, ti rih ohihi onyeeweh bala okpunyih olala.

Izikel 18:20

Ugboduh okpukpurwuh onyi mí onyi ko hobiri, o ka gbuh. Onyi nya ongongohe á ka yel oloh nya ohobiri nya adamwu chwu ka, leeh, adida o-yeh oloh nya ohobiri nya onyi nyamwu kpa ka inyinyi. Abwela onyiila nya olabwela onyiila ka jih uhyeh nya ongoowa. Ohobiri nya ongohobiri ka jih uhyeh nya ongohobiri oowa inyinyi.

Luk 15:32

Le, a wu eje ka, O rih ang ochila chila kahi ka chi okekeni u-uhyeh nya onyanya nya onyinang ole. Saji o-lala inyaa gbugbuh eneh-eneh. Ma, leele le, o ti jam bihi le. Ino, o bibih eneh-eneh, ma, leele le, ahi ti yoo le.

Etuh 11:19

Jaabwo ká abwela onyiila kaa kpa ohihi we onginyi, inyinyi, o ka la le. Ongole ko rwunye ba ang onyobih, juwa rwunye ba igwuh nya ilomwu inyinyi.

## JISOS KRAYIST KWURWU IGWUH

Uka oowa, Jisos keleh kaka yubwo gwuh akpa nya ogwuh oowa. Inyi le, angile ki juwa kpa akpa oowa a godayi riri ching lele. Oowa le, Jisos a yah ela, bih ogwuh oowa yekee, Okolobyah, m bingh yekee, wulejih leele me. Oowa le, ogwuh okolobyah oowa a chahi bwuh la igwuh, wulejih leele me. Oowa le, ogwuh okolobyah oowa a chahi bwuh la igwuh, wulejih hwuhwu jé juwa yah ela ahyaaahi ahyaaahi lele. —Luk 7:14, 15a

Uka ká Jisos yah inyi kpá le, o beh eko wurwu Lazaros la omih o-gbooh yekee, Lazaros! Gba kpeheh wari leele me! Inyi, ogwuh i-Lazaros oowa a wulejih bwuh la igwuh gba kpeheh lipwu lipwu ile ki ya roo a-abwo bala ata nyamwu wuh bala ipwu ile ki ya chi aba wuh oo a-ahi nyamwu wuh inyinyi lele. Oowa le, Jisos a bih angile ki juwa u-uwa yekee, Anu keleh kaka yih ipwu iwe hih oo kanu tu hih oo ko rwu me. Oowa le, i ho inyi lele. —Jon 11:43, 44

Ang oduduh kam há Oheh Oluhye Adida lume rih saji nya ole kaam ayidang mi hwuh ohihi nyam deejih ga ha igwuh. Saji kam ka mími-i hwuh ohihi nyam oowa tiri ekpe bwuh ejih. Ongongohe okila á juwa yeh ohihi nyam oowa bwuh ega nyam ka. Ma, am ayidang a wee tu ubwo hih oo deejih la ilom le. Saji, m la ongiri nya o-ka tu ubwo hih ohihi nyam deejih la iryah nya ilom mí bala o-ka hwuh oo bwuh ejih mí inyinyi. Saji, inyi, Oheh Oluhye Adam, a dam ehileh yekee, am nyi ho le. —Jon 10:17, 18

Am kpakpakpa a rih ongoowa ole kam juwa la ohihi eneh-eneh, kam gbuh le. Ma, ti ye me. M wulejih bwuh la igwuh, m mími jam hihi piyoo gbeh oyih mí oyih le. Amen. Am kpakpakpa a rih ongo kpa elele nya igbogolo nya onu ugbeyi nya igwuh o-nwu onginyi nwu bala inya onu ugbeyi nya ejegwuh ayidang kpangga lele.

—Owurwu Wurwu 1:18

# **EHILEH IWOH NYA OHEH OLUHYEH**

**Dutironomi 5:7-21**

**A la ihyeh ijigah kpong h kpong h bam ka.**

**A ho ekpekwuh, leeh, ang ole ko ka meh ingingihye e-epwooh, u-uhye, leeh, ingingihye o-meh ang ile ki jih odeh, e-ekpelejih, leeh, ingingihye o-meh ang ilepwa enyih odeh e-ekpelejih, ile ka ka chwu memh ka. A kwu arwu ejih haa, leeh, o-gbigba haa ka.**

**A hwuh enyi nya Ongolanu la Oheh Oluhye nyang hwukeh ka. Saji, Ongolahi la á ka ya ejeh rwu ongole ko hwuh enyi nyamwu hwukeh u-uhye nya oowa ka.**

**Áa kpa enuturwu omwiinyo nya Ongolanu la Oheh Oluhye nyang, ka chi igogo jwuh oo, jaabwo ka Ó dang ehileh. E-epwa nya enuturwu irwonye, a ka ho ukwurwo nyang wuh le.**

**Áa jwuh ihih nya adang bala inang jaabwo ka Oheh Oluhye Ongolahi la dang ehileh me.**

**A nwu onginyi eh eh ka.**

**A da ela-ahwu bala o-ho uya ka inyinyi.**

**A yoyih ka inyinyi.**

**A rih ibeenuh onookila ba onginyi eh eh oonang ka. Leeh, o-tito nya ahwu nya oonang ka, leeh, o-yehi riri epwa nya oonang ka, leeh, erwu nyamwu, bala anche aleng bala anche anyang ilepwa nyamwu, leeh, iyoh ilepwa nyamwu, leeh, ingingihye ile ki rih inya oonang ka.**

## Á KA KPIBAA HIIH OHEH OLUHYEH MÍ KA

Job 34:21, 22

Ahi nya Oheh Oluhyehe ye agbeyi nya abwela nya anyi nya anginyi eheh wuuh. Saji nya oowa le, o jé ingiile ki ho wuuh. Ukpowuh ololohe á jih, leeh, ang o-keh igwuh ole ká angihobiri ka jé-e kpibaa ka.

Ejej Onyiila 139:8, 12

Ó rih kám kpuhyeh ka epwooh, a juwa. Ó rih kam ya ang o-da nuneh nyam da o-obwilah, u-uwa, a jijih wee le. Eeh le, ká ukpowuh a kpu onginyi ibaa hingh Ahwu Oheh Oluhyehe mí ka. Ma, i-ilahi nyang, ahigbooh o-la aloduh mememeh bala inya enu ochichi. Ugbowuh bala ahigbooh wuuh la ookpokpoh i-ilahi nyang Ahwu Oheh Oluhyehe.

Jeremaya 23:34

Ongolahi la yekee, Iweh ibaa ohi jih ká onginyi ka kpibaa u-uwa kam ka jé-e yoo ka enenehe le? Am ayidang, M mi epwooh bala odeheh wuuh ka? Inyi, Ongolahi la a yah le.

Etuh 15:3

Ahi nya Ongolahi la jih ega mí ega wuuh, kaa ye ang inyi-bih bala inyiila ile ká anginyi eheh wuuh kaa ho.

Luk 8:17

Saji ingingihye á juwa ole ká onginyi eheh á tu kpu ibaa kpire kpire eneh le, ko ka jé-e chi eheh a-ahigbooh kaka le ka. Leeh, ang mí ang ole ká onginyi eheh á ho kwih kwih enen le, ko ka jé-e chi eheh a-ahigbooh kpu, anginyi eheh ka jé-e jóo gedeh gedeh inyinyi kaka le ka.

# **AKAMA O-GBEH OYIH MÍ OYIH NYA ANGI JĚ BALA O-MI LA OHEH OLUHYEH KA**

**Matiyu 13:41, 42**

Uka oowa, am Onyi nya onginyi eheh ole ka duh alegwuh erwu nyam erwu kaka kwuh angile wuuh ki kaa hobiri bala angile wuuh ki kaa ho ká anginyi eheh aanaa kaa wuh orih nya ohobiri ohoho kpeheh hih ipi adirahwu nyam. Oowa le, i ka goh ang inyibih iwa wuuh jwuh ka epwu nya ilah nya utiyoh otuka olobwilah ega ole ki ka juwa jeh idah bala o-ka juwa ka wangiri piyoo lele.

**Matiyu 18:8**

Saji nya oowa le, ó rih ubwo nyang, leeh, eta nyang, ko wee ka kpanya kaka wuh orih le, aale, áa choo daarwu hih ilong me. Saji, o ka hiigwuh hang gwu, nya o-ka rih olekwata, leeh, olekwubwo ká ka jwu ka epwu nya ohihi omimi-ka, gwu o-ka rih ongo la abwo imiimiyyeh, leeh, ata imiimiyyeh ki ti ka hwunggh jwuh ka epwu nya ilah o-gbeh oyih mi oyih piyoo.

**II Pita 3:7**

Ela olonu nya Oheh Oluhyeh olinyinyi, Oheh Oluhyeh a mími yah neejih rwú uhyeh-ogba nya epwoohed bala odeheh olelee duh ká Oheh Oluhyeh wee jwuh aa ito gbeh ilah o-ka rwaa rwu piih lele. Saji, Oheh Oluhyeh tu ubwo hih uhyeh-ogba nya epwoohed bala odeheh ole no gbeh enu uturwu ole ko ka ya ejeh nyamwu wuh angihobiri bala o-ka taa ayirejih gbang gbang.

**Ejeh Onyiila 9:17**

Angihobiri bala upwoma nya anginyi ile ki deyirih nya Oheh Oluhyeh wuuh, i kaa hwuh aa jwuh ka obwilah.

**Matiyu 25:46**

Uka oowa, i ka kwuh angi inyibih iwe wuuh rwu keleh ka epwu nya akama o-gbeh oyih mí oyih. Ma, alabwela onyiila wuuh ti ka jwu ka epwu nya ohihi omimi-ka.



## EJEH OLALA OLIJWUJWUH

Ukwurwo Nya Alerwu 17:31

Saji, Oheh Oluhye hwh uturwu ookpokpoh ohe no i-ilahi ole ko ka kpa abwela onyiila nyamwu la anginyi eheh ilodeheh ole wuuh ejeh piih le. Oheh Oluhye chwu Jisos Onyewe nyamwu koowa a ka rih ongo ka kpa onu la anginyi eheh ejeh la enu uturwu oowa le. Inyi, Oheh Oluhye a wuleh Jisos oowa ejih bwuh la igwuh nya ang o-jwuh ejee ha alodeheh yekee, Oheh Oluhye nyaa chwu Jisos inyilehi lele.

II Pita 2:9

Ole mejechi jaabwo ka Oheh Oluhye ayidang kaa bwuh gba angile ki rih anginyi nya Oheh Oluhye kpeheh bwuh epwu nya omaye nyaa wuuh. Ole ka mimi mejechi jaabwo ka Oheh Oluhye ayidang je kaa bwuh ya alabwela inyibih akama inyinyiinyi kinoo gbeeh pwu enu ututwu nya ejeh o-hih ekpe nyamwu.

Ala-Hiburuh 9:27

Saji, Oheh Oluhye hwuh uka ookpokpoh kemh no ha onginyi eheh onyi mi onyi ko ka gbuh. Uka ko gbuh kpá, o ka keleh kaka godayi riri i-ilahi nya ejeh nya Oheh Oluhye piih.

II ala-Korinti 5:10

Saji, ong mi ong lepwu nyahi wuuh juwa ka keleh kaka godayi riri i-ilahi nya echi nya ejeh olala nya Krayist piih, luka ole ko ka lahi ejeh. U-uwa, ongongoonwu a ka je-e yeh urih onyiila, leeh, urih otipyoo kwuh iwah nya ang mi ang onyiila, leeh, otipyoo ole kahi jam kpa ugbinyiro nyahi ho la ohihi nyahi olodeheh ole lele.

Ala-Rom 14:12

Saji nya oowa le, ong mi ong lepwari nyahi á ka dayih la o-ka keleh kaka yah ilomwu da odeheh i-ilahi nya Oheh Oluhye piih kaka.

## OGAHI ONAHI NYA JISOS KRAYIST

Ma, Adam bala ongoowa, á la ookpokpoh ka. Saji, Adam kpa igwuh ogbugbuh wari. Ma, ohihi, ongoowa a ti kpa wari bwuh la ogahi onahi nya Oheh Oluhyeh le. Le, jaabwo ká igwuh ogbugbuh chi kila anginyi eheh wuuh bwuh la ohobiri ohoho nya Adam le, o titi la gbadaa yekee, ohaha nya ohihi olala bwuh la ahyeerwerwa nya Oheh Oluhyeh, titi ka juwa ha irwuh nya anginyi eheh mwu aba ba bwuh la onahi nya Krayist oowa inyinyi piih le. —Ala-Rom 5:15

Saji nya oowa le, ochwuchwu nya Oheh Oluhyeh á doh pile i-iryah nya onginyi eheh ayidang, leeh, o-bwuh la jaa-bwo ká ongoowa juwa nwu ilomwu la ukwurwo ohoho lume ka. Ma, ochwuchwu oowa doh pile ayeerwerwa nya Oheh Oluhyeh ubwoomwu kemh. —Ala-Rom 9:16

Saji, Oheh Oluhyeh kaa tu alobooche pipi. Ma, Oheh Oluhyeh ti kaa ho angi dumwo onahi lume. —I Pita 5:5b

Uka oowa, alerwu onyiila nya Krayist juwa ka ongiri otuka otuka nya Oheh Oluhyeh rih ibeenuh e-epwu nya ela nya Oheh Oluhyeh oyayah pye nyaa, saji nya owulejih bwuh la igwuh nya Ongolahi Jisos. Oowa le, ahi owawa otuka otuka nya Oheh Oluhyeh a juwa u-uhyeh nyaa iwa wuuh lele. —Ukwurwo Nya Alerwu 4:33

Saji, m jé yekee, anu jé ang saji nya onahi nya Ongolahi Jisos Krayist ayidang. Jaabwo koowa ayidang, ino, rih ongo kpu udu otuka otuka e-epwoohed eneh ko ti tu ubwo hih ilomwu kaka rih olokpehikah, saji kanu ka bwuh la ebyahi nyamwu oowa rih angi kpu udu e-epwu nya ela nya Oheh Oluhyeh. —II Ala-Korinti 8:9

Obeh ojijih a juwa ha Oheh Oluhyeh Ongole ko kaa hwuh ohaha otuka ole ká onu nya onginyi eheh á ka jé yah da odeheh mí kaka, ga ha anginyi nyamwu.

—II Ala-Korinti 9:15

## ABWELA OYEDA

Luk 13:3

Eheh! Inyi, o la ka. Nya ilehi, m binuh yekee, ó rih kaanu ayidang á ye iryah da bwuh epwu nya ihobiri ihoho nyanu ka, aale, anu wuuh ka ta ayirejih inyinyi wee!

Ukwurwo Nya Alerwu 3:19

Le, anu ye iryah da leelee bwuh epwu nya ihobiri ihoho nyanu, kanu nya tiri ekpe chi Oheh Oluhyeh ogwu, ká Oheh Oluhyeh a yile ibih nya ihobiri ihoho nyanu iwa wuuh hiinuh me. Saji kanu ka jé-e la ilah ochichi o-bwuh ijata nya Ongolahi Oheh Oluhyeh e-epwu nya ohihi onyeeweh nyanu oowa inyinyi me.

Ukwurwo Nya Alerwu 2:38

Inyi, Pita a mími bih aa yekee, Anu ye iryah da bwuh epwu nya ihobiri ohoho nyanu wuuh, ká ong mí ong lepwu nyanu a keleh kaka hwu enyih Oheh la enyi nya Jisos Krayist nya ang o-jwuh ejee yekeé, Oheh Oluhyeh hinyo hih ihobiri nyanu wuuh hanu le me. Oowa le, anu titi ka yeh ohaha nya Olegwuh Igogo ole inyinyi lele.

Matiyu 3:2

Egbejwuh nya ela nya Oheh Oluhyeh ole ká Jon juwa yah jeh aa rih-ekee, Anu ye iryah da bwuh epwu nya ihobiri ihoho nyanu wuuh me. Saji uka nya ipi adirahwu nya epwoohed jwuh chwee lume le.

II Ala-Korinti 7:10

Saji, ó rih ká uhih nya Oheh Oluhyeh ojwujwuh olepwu okiletu nya onginyi eheh á kpa ongoowa kaka la ojwujwu nya okiletu u-uhyeh nya ohobiri ohoho nyamwu, ká ongoowa á ye iryah da bwuh epwu nya ohobiri nyamwu oowa le, o linyi a kaa kpa ongoowa kaka wuh ochida nva Oheh Oluhveh oyi le, ongoowa a kaa chi ijemah la ugbeyi ololohe kpong kpong kaka lele. Ma, jaabwo ká ojwujwu olepwu okiletu u-uhyeh nya ohobiri ohoho nya alodeheh ile ki jé Oheh Oluhyeh ka, á rih inya iryah oyeda ka le, inyaa iwa kaa kpa igwuh ogbugbuh kemh kilaa!

## OHINYO HIH NYA IHOBIRI NYA ANGINYI EHEH

Jisos mími yekee, Saji ó rih kanu juwa hinyo hih ihobiri nya angile ki hobiri baanu haa, aale, Oheh Oluhveh Adanu titi ka hinyo hih ihobiri nyanu anu hanu inyinyi le.

—Matiyu 6:14

Ma, ó rih ká ongole ko hobiri-i ka jih ekpe da ihobiri nya-mwu ile ko ho, ko ka juwa kpa ona odada nyam wuuh, ko ti juwa ho ingiile ká ehileh yah, nyi ho, bala o-ho ala inyila inyinyi, aale, ongoowa ka juwa hihi gbesh oyih mí oyih. Igwuh á ka nwoo kaka inyinyi.

—Izikel 18:21

Anu ya me! M godayi riri lee o-onu nya ugbeyi o-bwuh we epwu okiletu nya ong mí ong wuuh le! Ong mí ong ole wuuh ko woh omih nyam, ko rih ká ongoowa á mí wurwu ugbeyi nya okiletu nyamwu da dodoh ham, aale, m ka jwu keleh ka epwu nyamwu kaka rih ang oririh ta ongoowa. Aale, ongoowa ti titi ka jwuh epwediih nya ang oririh ta ongoowa. Aale, ongoowa ti titi ka jwuh epwediih nya ang oririh tam inyinyi le.

—Owurwu Wurwu 3:20

Ongole ko ho ohobiri a pe hih ugbeyi nyamwu oowa deejih. Ongole ko rih olabwela onyobih a ye iryah ilepwu nya okiletu nyamwu da inyinyi, ko rwu nya tiri ekpe we ega nya Ongolahi la me. Aale, o ka ye ongoowa ahyeerwerwa. Ongooowa a tiri ekpe ka ega nya Oheh Oluhyeh me. Saji, owa ayidang chogba nya ohinyo hih ha anginyi eh.

—Aiyasaya 55:7

Oheh Oluhyeh ti hwuh Jisos oowa keleh ka iwesh ahwurwu oluhyeh kaka hwuhwu u-ubwuririh nya ilomwu inyinyi le. Oheh Oluhyeh kpa Jisos oowa keleh ka iwesh ahwurwu nya olegbejwuh oririh bala Ongochida, ole ko ka kpa ala-Isirel kaka jé ang ole ká iryah oyeda rih bala o-ka ho ki ka jé-e yeh ohinyo hih nya ihobiri ihoho nyaa wuuh bwuh ega nya Oheh Oluhyeh mí le.

—Ukwurwo Nya Alerwu 5:31

## OCHEBWOH HIH ANG NYA ODEHEH OLE

Tayitos 2:11, 12

Saji Oheh Oluhyeh chi onahi nyamwu eheh ha anginyi eheh, saji ki ka bwuh loo, la ochida nyamwu le. Onahi nya Oheh Oluhyeh oowa a kaa mejeehi jaabwo kahi ka bwuh tu ubwo hih ugbeyi nya onginyi nya Oheh Oluhyeh oririh-ka wuuh, bejih bala imih nya inyiro olodeheh ole wuuh inyinyi le. Oowa le, ahi kaa jé-e kpa ela ojéje ho abwela e-epwu nya ang mí ang nyahi wuuh, bala ohihi nya abwela onyiila ohoho, bala inya onginyi nya Oheh Oluhyeh oririh kpeekpee e-epwu nya odeheh ole mí lele.

Ala-Kolosi 3:2

U-uhyeh nya ang abwo ile ki juwa e-epwooheh kemh, anu ka juwa meh imahi nyaa le. Anu meh imahi u-uhyeh nya ang abwo ilodeheh ole kpongk pongk kaka.

Ala-Efesos 5:11

Anu mi kanu kpa ubwo nyanu kaka jwuh ukwurwo nya ukpowuh nya ohobiri ohoho kaka, saji, í jwuh apyobwunah ololohe ka. Ma, okoko nya oowa le, anú-u juwa chi ihobiri ilinyi eheh a-ahigbooh me.

Ayisaya 1:16

Anu keleh kaka hyoh enyih kanu hwú ilonu cherih cherih me. Anu tu ibih nya ang inyibih nyanu ihoho kinyaa himh a-ahi, kanu bah la ang inyibih ihoho me.

I Jon 2:15, 16

Anu mi ká odeheh ole a háanu lume ka, leeh, ang mí ang il-epwu nyamwu kpongk pongk ka. Saji, ongole ká odeheh ole á juwa há lume le, aale, oháha olala nya ilehi ilehi e-ega nya Oheh Oluhyeh Adida á juwa e-epwu nya ongoowa kpongk pongk kaka. Saji, uma nya ang ile ki jam e-epwu nya odeheh rih ang ile ká imih nya inyiro nya onginyi eheh kaa mama, bala ang ile ká ehi nya onginyi eheh kaa mama, bala ang ile ki kaa hwuh obooche nya ohihi ha onginyi eheh. Ololohe lepwu nya ang iwe wuuh á bwuh ega nya Oheh Oluhyeh Adida kpongk pongk ka. Ma, iwa wuuh rih inya odeheh ole kemh.

# OMAMA ONYEEWEH

Izikel 36:26

M ka ya okiletu onyeeweh hanu bala o-hwuh ugboduh okpukpurwuh onyeeweh jwunuh e-epwu inyinyi. Okiletu onyoongiri lala ejwo ole ko jih epwu nyanu-u wee, M ka gboo hiinuh, oowa le, M ka ya okiletu omile mile lala ugbo jwunuh e-epwu lele.

I Jon 2:29

Jaabwo ká Krayist ayidang rih olabwela onyiila le, anu jé me, ong mí ong ole ko rih ongo ho abwela onyiila ubwoomwu a rih onyi nya Oheh Oluhyeheh nya ilehi le.

II Ala-Korinti 5:17

Saji nya oowa le, rih ká onginyi eheh á mi la Krayist le, aale, ongo onyeeweh, ongoowa a rih lele. Saji, abwela onyogoh nya ohobiri ohoho nyamwu wuh chipwurwu hih oo le. Abwela onyeeweh nya ohihi nya Krayist ubwoomwu kemh, ongoowa a la ugbenyi lele.

I Jon 5:18

Ahi jé yekee, ong mí ong ole ká Oheh Oluhyeheh á nwu ma onyeeweh le, ó kaa hobiri mimi ka ilahi ilahi kaka. Saji Onyewe nya Oheh Oluhyeheh ayidang kaa keh ongoowa le. Oheh onyobih á kaa yubwo nyamwu gwuh ongoowa mí kpongheh kpongheh kaka.

Jon 3:3

Jisos we bih oo yekee, Nya ilehi ilehi, m bingheh yekee, ó rih ki nwu onginyi ma onyeeweh kpá eneh ka, aale, ongoowa á ka jé-e ye ipi adirahwu nya Oheh Oluhyeheh e-ehi mí kaka.

I Pita 1:23

Saji leele le, i nwunu ma onyeeweh le. Ma, omama onyeeweh nyanu oowa á ti bwuh la uma nya eje nya ang ole ko kaa mama jwuh ejih mí kpongheh kpongheh ti ka. Ma, o bwuh la uma nya eje nya ang ole ko kaa mama mí kpongheh kpongheh kaka. Saji, o bwuh la ela olohihi bala ela o-gbeh oyih mí oyih nya Oheh Oluhyeheh ayidang kpongga.

# **IGWUH OGBUGBUH E-EGA NYA OHOBIRI; OWULEJIH BWUH LA IGWUH BWUH LA KRAYIST**

**Ala-Efesos 2:1 bala 6**

Ino, anu rih angi gbugbuh e-epwu nya olegwuh nyanu bwuh la ihih nya ela nya Oheh Oluhyeh ojwujwuh-ka nyanu, bala ihobiri ihoho nyanu eneh ká Oheh Oluhyeh ya ohihi onyeeweh hanu. . . . Inyi, Oheh Oluhyeh a kpahi ka epwu nya ohihi onyeeweh nya owulejih bwuh la igwuh ta Krayist le. Oowa le, Oheh Oluhyeh a kpahi kaka hwuhwu i-iweh ah-wurwu oluhyeh nya Krayist too e-epwu nya onginyi nya Oheh Oluhyeh oririh lele.

**Ala-Kolosi 3:1**

Jaabwo ká Oheh Oluhyeh wuleenuh ejih bwu la igwuh ta Krayist lele, anú-u juwa kpa iryah nyanu wuuh tito nya ang ile ki juwa e-epwoohed kemh, e-ega ole ká Krayist ayidang hwuhwu lale u-ubwuririh nya Oheh Oluhyeh me.

**I Pita 2:24**

Krayist ayidang a rih ongole ko yeh akama nya ihobiri nyahi ahi anginyi eheh kpa u-uhyeh nya ugbinyiro nyamwu bwuh la igwuh ole ko gbuh u-uhyeh nya okojih le. O ho inyi saji kaahi anginyi nya Oheh Oluhyeh ka jé-e gbugbuh e-ega ká ohobiri ohoho jih, kahi ka juwa hihi e-epwu nya abwela onyiila ohoho nya Oheh Oluhyeh kemh. Abe nya enyirih ile ki nyih Jisos a rih ang ole ko kaa kpa honu anu angi mimi udah nya edurwu lele.

**Ala-Rom 6:2 bala 11**

Saji, ahi angile kahi gbugbuh wuuh e-ega ká ohobiri ohoho jih kpá eneh-eneh le, anyanyi, ahi tí ka mími jé-e juwa hihi e-epwu nya ohobiri ohoho mími wee? . . . Inyinyi inyi-nyí, anu ayidang a titi la lele! Anu gbugbuh e-ega ká ohobiri ohoho jih le. Ma, anu tí jam hihi leele ha Oheh Oluhyeh bwuh la ongiri nya Krayist Jisos le.

## OHIIHI OMÍMI-KA

Ala-Galetiya 6:8

Saji, ong mí ong ole ko juwa to ugbeh nya abwela ohoho ha ugbinyiro nyamwu bwuh la o-juwa dire imih nya ugbinyiro nya ilomwu kemh, aale, ongoowa titi ka bwuh la ugbinyiro nyamwu oowa hya igwuh ogbugbuh ta ayirejih piyoo. Ma, ong mí ong ole koowa á ti juwa to ugbeh nya abwela ohoho ha Olegwuh Igogo bwuh la o-juwa dire iryah nya Olegwuh Igogo kemh, aale, ongoowa titi ka bwuh la Olegwuh Igogo oowa la ohihi omími-ka piyoo inyinyi piih.

Jon 17:3

Ole a rih ohihi omími-ka oowa lele, anginyi eheh, o-ka jé yeeyee yekee, Ahwu kpakpakpa nyaa rih Oheh Oluhyeh nya ilehi ilehi oowa lele, bala o-ka jé Jisos Krayist ongole ká duh erwu wari we odeheh ole yeeyee inyinyi.

Jon 3:36

Ong mí ong ole ko mi la Onyewe nya Oheh Oluhyeh oowa le, aale, o la ohihi omími-ka le. Ma, ong mí ong ko ti mi mi la Onyewe nya Oheh Oluhyeh oowa kaka le, aale, ó ka ye ohihi omími-ka oowa e-ehi kaka. Ma, agbama nya Oheh Oluhyeh ubwoomwu kene kene a ka juwa too piyoo lele.

Ala-Rom 6:23

Saji, urih nya ohobiri ohoho rih igwuh ogbugbuh. Ma, ogahi onahi nya Oheh Oluhyeh rih ohihi omími-ka bwuh la Krayist Jisos Ongolahi.

Jon 5:24

Nya ilehi ilehi, m binuh yekee, ong mí ong ole ko woh ela nyam, ko mi la ongole ko dumh erwu wari la okiletu ookpokpoh le, aale, ongoowa la ohihi omími-ka e-epwu nyamwu le. Aale, ongoowa ayidang á ka jwuh ka epwu nya ejeh owuwuh nya Oheh Oluhyeh kaka. Ma, o gba kpeheh bwuh epwu onu nya igwuh, jwu ka epwu nya ohihi o-piyoo le.



## ANG O-KPA JÉ OCHIDA

Ukwurwo nya abwela onyiila o-yah da odeheh ka rih okpunyih. O-yah da odeheh meje anginyi nya abwela onyiila ka rih o-la kembee bala o-jé yeeyee yekee, owa nyi la ochida le, gbek oyih mí oyih. —Ayisaya 32:17

Anu anyi ichicheh nyam, anu mi ká oháha olala nyahi a rih oháha olugbonu kemh, leeh, inya ela oyaya ka. Okoko nya oowa le, kahi me oháha olala nyahi je bwuh la abwela onyiila bala ela nya ilehi ohoho kemh me. Bwuh la oháha olala oliiwe, ahi kpa jé yekee, ahi juwa hihi e-epwu nya ela nya ilehi ohoho le. Oháha olala oowa a mimi kaa hwuh o-jé mimi ha okiletu nyahi jahi da Oheh Oluhyeh mí inyinyi le, ko ririh ká okiletu nyahi á juwa maga nya o-ya ejeh wuhih wuwuh la ugbeyi okila, aale. —I Jon 3:18, 19

Ang o-jwuh ejee nya o-rih-ekee, ahi ye rih onu-onyi nya Oheh Oluhyeh inyilehi a rih Olegwuh Igogo nya Onyewe ole ká Oheh Oluhyeh ya duh wari we epwu okiletu nyahi le. Olegwuh oowa a kaa kpahi wurwu Oheh Oluhyeh yekee, Adada Oheh Oluhyeh Adida nyam le. —Ala-Galetiya 4:6

Ong mí ong ole ko woh ehileh nyam, ko juwa kpa ho ukwurwo le aale, ongoowa, m há nya ilehi ilehi le. Ong mí ong ole kam ti há nya ilehi ilehi le, aale, ongoowa ka há Oheh Oluhyeh Adam inyinyi le! Aale, am ayidang ti ka la oháha e-ega nya ongoowa nya ilehi ilehi inyinyi, bala o-ka juwa chi ilom eheh meje ongoowa inyinyiinyi le. —Jon 14:21

Saji, Olegwuh nya Oheh Oluhyeh ayidang a kaa rih ibeenuh nya olegwuh olepwu nyahi ahi angi mimi yekee, ahi nyi rih anyi nya Oheh Oluhyeh inyilehi le! —Ala-Rom 8:16

Ang ole kahi kpa jé yekee, ahi juwa hihi e-epwu nya Oheh Oluhyeh bala Oheh Oluhyeh ayidang o-titi juwa hihi e-epwu nyahi rih, Olegwuh Igogo nyamwu ole ko ya hahi. —I Jon 4:13

# **JISOS KRAYIST OLE KO KWU EPWA E-EPWU NYAHI KAA YA OKEKENI HAHÍ**

**Jon 17:13**

Leelee le, m juwa ka nya tiri ekpe ching Ahwu Oheh Oluhyeh ogwu le! Ma, m ti jam yah ala ile wuuh leelee jeh aa luka ole kam jam odeheh ole taa wee. Saji ká okekeni nyam ka jé-e mí epwu nya okiletu nyaa pweepwee bwuh la oowa.

**Ala-Rom 14:17**

Saji, a-ang oririh olam olam owe, leeh, ang onwanwa ka epwu ole, a rih ang o-jwuh ejee nya ipi adirahwu nya Oheh Oluhyeh ka. Ma, abwela onyiila nya Oheh Oluhyeh ohoho bala okpunyih olala bala okekeni o-juwa chichi e-epwu nya Olegwuh Igogo, a rih ejee na ipi adirahwu nya Oheh Oluhyeh oowa le!

**Ala-Galetiya 2:20**

Saji i gwumh iloooh ba okojih ta Jisos Krayist eneh-eneh le. Le, ám ayidang a lee hihi leelee kaka, ma Krayist ongo kwu epwu nyam me ini. Saji, ohihi nyam ole kam lee hihi odeheh ole le, m jam loo bwuh la ehi o-da hileh Krayist Onyewe nya Oheh Oluhyeh, Ongole kam, há lume gbeeh ko hwuh ilomwu kpa kila iyah saji nyam.

**Ayisaya 12:3**

Saji nya oowa le, la okekeni, anu ka chí enyih bwuh epwu nya iwelu nya ochida le.

**Jon 15:11**

M jam yah ala ile wuuh jenuh leelee, saji ká okekeni ochichi otuka nyam ka jé-e hih juwa e-epwu nyanu piyoo, saji ká okekeni olepwu nyanu ka jé-e minú pweepwee.

**Ejeh Onyiila 16:11**

Ahwu Oheh Oluhyeh a ka me ugbeyi nya ohihi jém le, saji i-ilahi nyang Ahwu ayidang, okekeni omími-ka olam olam a jih le. U-ubwuririh nyang, ang ikpipyo ilam ilam a ti jih inyinyi gbèh oyih mí oyih le.

# **ELA NYA OHEH OLUHYEH OWOWOH JUWA KPA HO UKWURWO BABA LUME**

**Ala-Rom 6:16**

Leeh, ánú tí jé ela ole leka? Ong mi ong ole kaahwu ayidang á juwa jwuh ihih nya ang mi ang ole ko bingh yah, ahwu nyi ho me le, aale, onyohi nya ongoowa, a rih lele. Inyinyi, o ka la hanu lele. Ó rih ihih nya ohobiri ohoho ole ko kaa kpa igwuh ogbugbuh kila onginyi eheh, kanu juwa jwuh le, aale, onyohi nya ohobiri ohoho, anu rih lele. Leeh, ó ti rih ihih nya Oheh Oluhyeh ojwujwuh ole ko kaa kpa abwela onyiila nya Oheh Oluhyeh kila onginyi eheh kanu juwa jwuh le, aale, onyohi nya abwela onyiila, anu rih inyinyi lele.

**II Tesalonayika 1:7-9**

Oowa le, Oheh Oluhyeh la ilomwu a ka hwuh omwiinyo nyamwu hanu anu angile wuuh kanu wee ye akama bala ahi ayidang luka ole ká Ongolahi Jisos ka hih eheh bwuh epwooh hirejih wari la ongiri otuka nyamwu bala alegwuh erwu inyiingiri nyamwu, e-epwu nya owurwuh wurwuh nya elele ilah lele. Oowa le, o ka hwuh akama ha angile wuuh ki jé Oheh oluhyeh ka, tu angile wuuh ki mi jwuh ihih nya erwu onyiila nya Ongolahi Jisos Krayist ole kaka, kwuh iwah nya oowa inyinyi lele. Akama oyeye nya angiiwa wuuh ka rih ayirejih otata o-gbeh oyih mi oyih bala ebwoh ochichi hih ijata nya Ongolahi ayidang bala ebi-ebi nya ongiri otuka nyamwu inyinyi.

**Dutironomi 11:26-28a**

Anu woh me. Ale ole, M hwuh ahi owawa bala olo o-ga jwuh no hanu. O ka rih ahi owawa, ó rih kanu kpa ehileh nya Ongolahi Oheh Oluhyeh nyanu, ile kam wee danu ale. O ti ka rih olo o-ga jwunuh ó rih kanu ka mi-i kpa ehileh nya Ongolahi la Oheh Oluhyeh nyanu ka.

# O-YAH KRAYIST DA ODEHEH BABA LUME

Ala-Filipayi 2:11

Oheh Oluhyeh mimi hwuh ni yekee, elele nya ong mi ong wuuh nyi ka juwa yah Jisos Krayist oowa da odeheh lala Ayibaba O-loo la piih, saji nya o-ka ya ogboh ha Oheh Oluhyeh Adida inyinyi le.

Matiyu 10:32, 33

Jisos mimi bih aa yekee, Ong mi ong ole ko ka juwa yamh da odeheh lala Ongochida nyamwu, aale, am ayidang titi ka yah ongoowa da odeheh i-ilahi nya Oheh Oluhyeh Adam olepwooheh lala ongo bam je inyinyi. Ma, ong mi ong ole ko ti ka pwam am Krayist rwarwu yekee, owa nyi rih onginyi nyam kpong kpong ka, aale, am ayidang titi ka pwa ongoowa rwarwu i-ilahi nya Adam olepwooheh inyinyi.

Ala-Rom 10:9, 10

Saji, ó rih ká ka mi-i kpa onu nyang yah Jisos Ongolahi da odeheh lala Ongolang la, ká ka mi kpa okiletu nyang wuuh mi yekee, Oheh Oluhyeh nyi wuleh Krayist oowa ejih bwuh la igwuh inyilehi le, aale, a ka la ochida nya ugboduh okpu-kpurwuh nyang le. Saji, omimi olala e-epwu nya okiletu nyahi a duh ká Oheh Oluhyeh kaa kpa wa angi mimi ilinyi nya alabwela onyiila i-ilahi nya ilomwu le. Onu nyahi, o ti kpa yah Krayist oowa da odeheh lala Ongochida nyahi, a ti kaa kpahi kaka yeh ochida nyamwu oowa inyinyi lele.

Luk 9:26

Saji ong mi ong ole ko ka juwa jwuh oyih nya o-yah ilomwu da odeheh lala ongo jih oyeh nyam bala erwu onyiila nyam ole, aale, am ayidang titi ka jwuh oyih nya o-yah ongoowa da odeheh lala onginyi nyam ka luka ole kaam Onyi nya onginyi eheh ole ka mwu ogile wari we odeheh ole la ogboh otuka nyam bala ogboh otuka nya Oheh Oluhyeh Adida bala inya alegwuh erwu igogo nyamwu inyinyi.

# OHEH ONYOBIBI A RIIH OLUJIIH NYAHI OGWUGWU WUUH LE

## I Pita 5:8

Anú-u juwa kpehi ching nya ela, kanu juwa kpehi jwuh ilonu yeeyee uka wuuh me. Saji, oheh onyobih olujih nyanu juwa kaa ga tu ang ang da, juwa da urweh nya ong mi ong ole ko ka yeh wuh rih lala ugebe a juwa da urweh nya iyoh.

## Matiyu 4:1 bala 10, 11

Inyi, uka ká Olegwuh nya Oheh Oluhyeh kpa Jisos keleh ka ugbilejih le, oheh onyobih a ma Jisos ye u-uwa lele. Jisos we bih oo yekee, Ahwu oheh onyobih owe, tu keleh himh piih! Upwu Igogo yekee, Ongolahi Oheh Oluhyeh nyang ubwoomwu kemh a rih Ongole ká ka raabwo ha, juwa mi erwu hoo e-epwu nya igba ogbagba ha kemh inyinyi le. Inyi le, oheh onyobih a rwu hih Jisos le, alegwuh erwu nya Oheh Oluhyeh a keleh ka ega nya Jisos juwa mi erwu hoo u-uwa lele.

## Ala-Efesos 6:11

Kanu goh ang abwo nya agidih nya ewu odada nya Oheh Oluhyeh wuuh kwurwu ilonu me. Saji kanu ka jé-e bwuh la oowa godayi riri girih girih, jé juwa tu ijechi nya oheh onyobih wuuh pipi mí me.

## Ukwurwo Nya Alerwu 26:18

M juwa dungh keleh ká ka wurwu egbahi nya angile ki kpu iduh bwuh la ohobiri ohoho nyaa, saji ká angiiwa ka jé-e ye iryah da bwuh epwu nya ukpowuh nya ang inyibih iwa ihoho, ki ka jwu ka epwu nya ahigbooh nya abwela onyiila nya Oheh Oluhyeh. Ká ka mimi-i gbaa kpeheh bwuh epwutubwo nya ongiri nya oheh onyobih keleh ka epwutubwo onyoongiri nya Oheh Oluhyeh. Saji ká angiiwa ka jé-e yeh ohinyo hih ihobiri nyaa, ki ka la iweh ahwurwu ta anginyi nya Oheh Oluhyeh ile wuuh ká Oheh Oluhyeh hwáa cherih cherih ha ilomwu bwuh la omimi olala u-uhyeh nyam am Jisos me.

# ANGINYI NYA OHEH OLUHYEH KWURWU OHEH ONYOBIIH

## II Tesalonayika 2:8

Oowa le, ongo onyobih oowa ayidang a ka chi ilomwu ehed gedeh gedeh lele. Inyi le, Ongolahi Jisos a ka kpa ihwu odada o-bwuh onu nya ilomwu nwu ongo onyobih oowa lele. Jisos ka too ayirejih gbang gbang bwuh la ebi-ebi nya ogboh nya ilomwu luka ole ka Ongolahi ayidang ka mwu ogile wari mimi.

## Jemsi 4:7, 8a

Saji nya oowa le, anu kpa ilonu wejih ha Oheh Oluhyeh me. Kanu godayi kpakpakpa, juwa tu oheh onyobih pipi me, aale, o oheh onyobih ka rwunye rwu hiinuh le. Ó rih kanu tu ilonu jwuh Oheh Oluhyeh chwee, aale, Oheh Oluhyeh titi ka tu jwunuh chwee inyinyi.

## Ala-Rom 8:35 bala 37

Eeh le, ó rih inyi le, o-owoh a ti tutum mimi ka jé-e chihi ebwoh hih oháha nya Oheh Oluhyeh ole kahi la e-epwu nya Krayist mí wee? Akama, a ka chihi ebwoh oowa mí le? Leeh, ang ojwujwu tí? Leeh, o-tu pipi tí? Leeh, imih o-nwuhi nwu tí? Leeh, o-jih lohi lohi yeh ang durwuh ka ti? Leeh, ang ojwujwu o-tuuh bejih kpali kpali tí? Leeh, ema nya ewu tí? O ti linyi kpá oduh inyi! Ahi rih angi kwurwu kwurwu ma kwurwu i-ilahi nya ang iwe wuuh bwuh la ongiri nya Krayist Ongole kahi há lume.

## I Jon 3:8

Ong mí ong ole ko juwa hihi ka ilahi ilahi e-epwu nya ohobiri ohoho wee, aale, onyi nya oheh onyobih ayidang, ongoowa a rih le. Saji ohobiri ohoho a rih ukwurwo nya oheh onyobih bwuh omwu odada le. Ang oduduh ka Krayist Onyewe nya Oheh Oluhyeh wari we odeheh ole rih, saji ko ka ta ukwurwo nya oheh onyobih oowa ayirejih gbang gbang.

## ONGINYI O-HÁNG HÁ A RIH ANG O-JWUH EJEE NYA ONGINYI NYA OHEH OLUHYEH ORIRIH LE

Ó rih ká ongongohe á juwa yekee, Oheh Oluhyeh hám lume, ká onginyi eheh oonamwu á ti juwa woo eje, aale, olonookila, ongo olinyi a rih le. Saji, ó rih ká onginyi á la oháha e-ega nya onginyi eheh oonamwu ole ko wee ye e-ehi ka, aale, ongoowa á titi ka jé-e la oháha e-ega nya Oheh Oluhyeh Ongole ko jé juwa ye e-ehi kponghe kponghe ka le ka.

—I Jon 4:20

Ugbeyi ole ko hiigwuh gwu wuuh rih-ekee, ó ririh kam jé juwa yah ela la ojah nya anginyi eheh bala o-yah ela la ojah nya alegwuh erwu wewe wee, aale, ó rih ká oháho olala nya ilehi ilehi á juwa e-epwu nyam ka, aale, m ti ti jwuh apyobwunah nya ingingihye kaka. Saji, ela oyayah nyam oowa lala omonyó o-hih deejih nya ugwoojeh bala atang onmolong nmolong.

—I Ala-Korinti 13:1

Ó rih kaanu ayidang á juwa la oháha e-ega nya awule nya ilehi ilehi inyi le, aale, anginyi wuuh a ka jé yekee, anu nyi rih angijugbeyi nyam inyilehi lele.

—Jon 13:35

Ma, ugbeh nya Olegwuh Igogo nya Oheh Oluhyeh ti rih, oháha nya ilehi ilehi olala, okekeni ole ko kaa gbuh enyih-ka olala, okpunyih olala o-okiletu, ugboduh ojwujwuh onyudiyoh olala e-ega nya angi ikila, onahi olala e-ega ká angi ikila jih, onginyi onyiila oririh, ongo chila o-hwuh okiletu ha oririh, odumwo olala, bala ang o-ho ba o-oyih.

—Ala-Galetiya 5:22, 23a

Ahi ayidang jé yekee, ahi gba kpeheh bwuh epwu nya igwuh kaka jwuh ka epwu nya ohihi le. Ahi jé inyi, saji nya ole kahi jam la oháha u-uhye nyanginyi eheh aanahi. Ma, ong mi ong ole ko ti la oháha e-ega nya onginyi eheh oonamwu ka, aale, ugboduh okpukpurwuh nya ongoowa juwa e-epwu onu nya igwuh piyoo wee.

—I Jon 3:14

# **OWULEJIH BWUH LA IGWUH NYA JISOS KRAYIST**

**Ukwurwo Nya Alerwu 10:39-41**

Ahi angile ayidang kpakpakpa a domwu rih alibeenuh nya ukwurwo iwa ile wuuh ká Jisos juwa ho o-opi nya ala-Juuh bala epwejih nya Jerusalem lele. Inyi le, i wuh Jisos oowa kpa kaka nwu bwuh la o-gwuh oo iloooh ba okojih lele. Ma, Oheh Oluhyeh ti wuleh Jisos oowa ejih bwuh la igwuh lahi lahi la enu uturwu ohata. Oowa le, Oheh Oluhyeh a chi Jisos eheh mejeehi lahi lahi uka ko wulejih bwuh ka igwuh kpá lele. A-anginyi wuuh, Oheh Oluhyeh a chi Jisos eheh ha lahi lahi uka ko wulejih bwuh la igwuh kpá ka. Ma, ahi angile ká Oheh Oluhyeh chwuchwu kahi ka rih alibeenuh nya ela oowa kemh, o chi Jisos eheh meje le. Ahi ayidang, domwu rih ang oririh bala o-nwa ang onwanwa ta Krayist oowa luka ole ko wulejih bwuh la igwuh kpá, jé le.

**Ala-Rom 4:25**

Saji, Oheh Oluhyeh hwuh Jisos duh wari kaka gbuh wonu nya ihobiri ihoho nyahi wuuh jwuh bala owuleh Krayist ejih bwuh la igwuh, saji ko ka bwuh la Krayist oowa wahi lala alabwela onyiila i-ilahi nya ilomwu.

**Jon 20:26-28**

Inyi, uka ká uturwu ohanekwuh wari le, angijugbeyi nya Jisos a juwa u-ubeh, tu ugbeyi kwuh ilaa mimi lele. Uka oowa le, Tomas ti juwa ugbenyi le. Oowa le, Jisos a hwuh gegile, godayi riri e-epwariri nyaa le, o bih aa yekee, Okpunyih a juwa hanu. Inyi, Jisos a bih Tomas yekee, Kewe, ká ya ukwuchwu nyang gwuh ukpurwuh nya iloooh olubwo nyam bala ukpurwuh nya uwangga olaka nyam me. Ká iwee odada nyang owe a mi hingh, ká jé la omimi ale me. Tomas we bih Jisos yekee, Ongolam bala Oheh Oluhyeh nyam.



# OWULEJIH BWUH LA IGWUH A RIH OHWU NYA IRYAH OLOGBOH NYAHI GWU WUUH LELE

Jon 5:25 bala 28, 29

Nya ilehi ilehi, m binuh yekee, uka juwa wari, oleelee a domwu rih uka oowa lele! Ká angile wuuh ki gbugbuh kpá wuuh le, ka woh omih nya Onyewe nya Oheh Oluhyeh. Angiiwa ile ki ka woh omih nyamwu oowa ka la ohihi omími-ka. . . . Saji nya oowa le, o lanu ahibwuuh o-oluhyeh nya owe kponggh kponggh ka! Uka juwa wari ká angile ki gbugbuh juwa i-iworwuh nyaa wuuh ka woh omih nya Onyewe nya Oheh Oluhyeh! Uka oowa, egwuh iíwa wuuh ka gba kpeheh bwuh epwu nya iworwuh nyaa. Angile ki ho abwela onyiila nya Oheh Oluhyeh, ka wulejih bwuh la igwuh kaka la ohihi omími-ka. Angile ki ti ho abwela onyobih, ka wulejih bwuh la igwuh ka jwuh ka epwu nya ejeh owuwuh nya Oheh Oluhyeh piyoo.

Ala-Rom 6:3-5

Leeh, ánú tí jé yekee, ahi angile wuuh kahi la ohihi onyeeweh nya Krayist, duh ki hwuhi enyih Oheh la enyi nya Krayist Jisos wuuh lee le, ahi nyi hwu enyih Oheh oowa nya ang o-jwuh ejee yekee, ahi nyi titi gbuh igwuh nya Krayist ole kii nyi gbuh too inyinyi le, kponggh kponggh ka? Bwuh la enyih Oheh ohwuhwu nyahi oowa, o rih ang o-jwuh ejee yekee, jaabwo kahi bá igwuh nya Krayist bá gbuh too le, i titi jwuhih ejih bala Krayist inyinyi le. Olinyi, saji jaabwo ká Krayist wulejih bwuh la igwuh, juwa hihi mimi bwuh la ongiri ebi-ebi nya Oheh Oluhyeh Adida lele, ká oowa ka ho ko ka jé-e chikpee hahi kahi titi ka juwa jediye e-epwu nya ohihi onyeeweh nya Krayist mí. Saji, jaabwo kahi bá igwuh nya Krayist bá gbuh too le, inyinyi inyinyi, ahi titi ka bá ohihi nya owulehjijh bwuh la igwuh nyamwu bá la too inyinyi piih lele.

## IGOGO OLALA HA ONGOLAHİ LA

Oheh Oluhyeه gbahi kpeheه bwuh epwutubwo nya alujih nyahi, saji ko ka dahi ubwo kahi ka juwa mi erwu hoo la uhieh ojwujwuh kpongه kpongه kaka. Saji kahi ka kpa igogo olala bala abwela onyiila ohoho mi erwu i-ilahi nyamwu piyoo gbееh pwu enu uturwu na ohihi nyahi wuuh.

—Luk 1:74, 75

Jaabwo kahi la irwuh nya onu omimi iliіwe wuuh bwuh ega nya Oheh Oluhyeه lele, anu angі hám há, anu cherih kahi juwa hwú ilohi cherih cherih e-epwu nya abwela ohoho nyahi wuuh, bwuh epwu nya ang mi ang ole ko ka chi ugbingyіro nyahi iri, leeh, o-chi olegwuh nyahi iri, kahi la igogo kpeekpee bwuh la uhieh nya Oheh Oluhyeه ojwujwuh e-epwu nya ang mi ang wuuh me.

—II Ala-Korinti 7:1

Saji nya oowa, le, onginyi nya Oheh Oluhyeه onyi mi onyi ole ko mi kpa ilomwu cherih cherih i-ilahi nya Oheh Oluhyeه bwuh la ochejih ba ang inyibih ihoho wuuh le, aale, ongoowa, Oheh Oluhyeه a titi ka chi iogogo jwuh ha ilomwu ko ka kpa ho ukwurwo olihih-ihih bala onwula ongoowa no gbеh o-kpa ho ukwurwo onyiila onyi mi onyi ha ilomwu inyinyi lele.

—II Timoti 2:21

Ma, okoko nya oowa le, jaabwo ká Oheh Oluhyeه Ongole ko beh eko wurwuunu kaka rih anginyi nyamwu rih Ongo oligogo le, anú-u titi juwa la igogo e-epwu nya abwela ohoho nyanu wuuh uka wuuh me.

—I Pita 1:15

Anu rih angile ká Oheh Oluhyeه Adida chwuchwu ha ilomwu jaabwo koowa ayidang meh obih eneh-eneh yah, owa nyi ka ho. Anu mimi rih angile ká Oheh Oluhyeه kpa Olegwuh Igogo nyamwu chinu ebwoh ha ilomwu, saji kanu ka jé ihieh ojwujwuh nya ilehi ilehi. Saji, ká Jisos Krayist ka jé-e bwuh la oowa kpa iwo nyamwu nyih ilo hwunu inyinyiinyi. Ká onahi nya Oheh Oluhyeه bala okpunyih nyamwu a juwa tanu ogwogwu mwu aba ba me.

—I Pita 1:2

## IGOGO OLALA HA ONGOLAHİ LA

Ayisaya 35:8

Ugbeyi ucheh otuka otuka ohe ka juwa, owa a rih ugbeyi le. I ka wurwu enyi nyamwu, Ugbeyi Nya Igogo Olala. Ang mí ang ole ko la igogo ka, ko la cherih cherih ka, á ka chwuchwu bwuh ugbeyi oowa kponggh kponggh ka. Ugbeyi ucheh oowa ka rih inya angile ká ugbeyi onyiila há. Aluchih ka pi onu nya ela u-uwa ka.

Ala-Hiburuh 13:12

Inyinyi, Jisos ayidang a titi hwuh ohihi nyamwu kpa kaka kila iyah u-uhyeh nya okojih u-ugwume epwa nya epwejih ko ka kpa iwo nyamwu oowa hwúuhi cherih cherih bwuh epwu nya ihobiri ihoho nyahi wuuh lele.

I Jon 1:9

Ma, ó rih kahi ti mi yah ihobiri nyahi ile kahi ho wuuh da odeheh jeh Oheh Oluhyeh, aale, Oheh Oluhyeh rih Ongo chila o-hwu okiletu ha, bala o-la kpeekpee le, Ó ka hinyo hih ihobiri nyahi iwa wuuh hahi, bala o-ka hwúuhi cherih cherih bwuh epwu nya ang mí ang inyibih ile wuuh kahi ho inyinyi.

Matiyi 3:11

Am le, m jam kpa enyih olam olam hwunu enyih Oheh la enyi nya Oheh Oluhyeh ko ka rih ang o-jwuh ejee yekee, anu ya iryah da bwuh epwu nya ihobiri ihoho nyanu wuuh le. Ma, ongohe ole koo wee ka wari e-ekpe nyam le, Olegwuh Igogo bala ilah, o ka kpa hwunu enyih Oheh le. Ongoowa rih ongo otuka gwum lume kaka kpoyeh. Le, m domwu chila i-ilahi nyamwu kpu, m ka kpa ugbete nyamwu hoo kponggh kponggh ka.

Ala-Efesos 1:4

Saji, Oheh Oluhyeh chwuhi kahi ka rih anginyi nyamwu bwuh la Krayist eneh-eneh ká Oheh Oluhyeh ho odeheh ole. Saji kahi ka jé-e rih angi la igogo bala o-la abi okpukpu ololohe kaka i-ilahi nya Oheh Oluhyeh lele.

# ANGILE KÁ OLEGWUH IGOGO MI EPWU NYAA

Luk 11:13

Eeh le, ó rih kaanu anginyi eheh angi itipyo a-abwela iwe, á jé kaa hwuh ang inyiila ga ha anyi nyanu mi le, anyanyi, anu ti meh iryah ká Oheh Oluhyeh Adanu olepwoohé á ka jé-e hwuh Olegwuh Igogo nyamwu ha angile wuuh ki juwa biloo Olegwuh Igogo oowa kaka dachichih me?

Ukwurwo Nya Alerwu 1:8

Ma, anu ka yeh ongiri nya Oheh Oluhyeh uka ká Olegwuh Igogo á chi kwurwuunu kpá. Oowa le, anu ka rih alibeenuh nyam u-uwa e-epwejih nya Jerusalem, bala u-uwa i-ipi nya Judiyah wuuh, bala i-ipi nya ala-Sameriya wuuh lalala jwuh keleh ka obaba nya odeheh ole wuuh lele.

Izikel 36:27

Uka oowa, M ka hwuh Olegwuh Igogo nyam jwunuh e-epwu nyanu, saji kam ka ho kanu ka juwa jediye bala o-ho abwela onyiila e-epwu nya ona odada nyam. Bwuh la oowa le, anu ka kpa ejeh olala nyam bala ejeh ochichi nyam ho ukwurwo.

Ala-Rom 8:9

Ma, jabwo ká Olegwuh Igogo nya Oheh Oluhyeh ti kwu u-uwa e-epwu nyanu lele, anu tutum rih angi ka juwa ba imih nya ugbinyiro nyanu je mími ugbenyi kaka. Ma, iryah nya Olegwuh Igogo olepwo nyanu oowa kemh, anu ka juwa ho lele. Ong mí ong ole ko la Olegwuh nya Krayist e-epwu nyamwu ka, aale, ongoowa á rih inya Krayist kponggh kponggh leka.

Ukwurwo Nya Alerwu 4:31

Inyi, uka ki raabwo oowa kpá le, ega oowa ole ki jih a juwa hwú jigih jigih lele. Oowa le, iwa wuuh a mi la ongiri nya Olegwuh Igogo nya ilehi ilehi le, i juwa yah ela nya Oheh Oluhyeh da odeheh mí la ongiri ongiri la uhíh ojwujwuh-kaka lele.

# ONU OMIMI ILEBI-EBI ITUKA HA ANGINYI NYA OHEH OLUHYEH

Ejeh Onyiila 34:18

Oheh Oluhyeh kaa jwuh angile ká okiletu kaa kpaa enyih oo-la ela nya Oheh Oluhyeh. O kaa chi angile ká ugboduh okpukpurwuh nyaa la kpakpa e-ega nyamwu da.

Ayisaya 66:2

Ongolahi la yekee, Ingiile wuuh, Am a haa la ubwo nya ilom le, saji nya oowa le, ang ile wuuh rih inyam. Ma, anu-u woh me. Ongole kam ka ye alee lele. Ongole ko kpa ilomwu wejih bala ongole ká ugboduh okpukpurwuh nyamwu la kpakpa i-ilahi nyam koo jwuh uhih, hwú kpakpakpa uka ole kam yah ela, ongoowa, M ka ye le.

Owurwu Wurwu 21:4

Oheh Oluhyeh ka yile egbejidah hih egbahi nya anginyi nyamwu iiwa wuuh. Igwuh ogbugbuh ololohe á ka jih kaka. Leeh, idah obaba bala idah ojejehe ololohe o-ka jijih kaka. Leeh, ang ojwujwu ololohe, o ka jih kaka inyinyi. Saji, ang mí ang inyogoh wuuh chipwurwu kam ugbenyi le.

Ejeh Onyiila 37:3

Hwuh okiletu nyang wuuh niro Ongolahi la, ká ho ang inyiila. Oowa a ka kwu opi oowa mí le. Nya ilehi, i ka ya ang oririh hang wuh epwu uka wuuh.

I Pita 4:12, 13

Anu angi hám há, uka ká omaye otuka á wari kaka da omimi olala nyanu uyah, aale, o lanu ahibwuuh lume ka, lala o-rih-eeke, ang ole ko la ununa nyaa ho we e-ega nyanu ka. Okoko nya oowa le, anu-u juwa chi okekeni yekee, iwa nyi kijih juwa bá akama bá akama bá ye ta Krayist le me. Saji ká okekeni ochichi nyanu ka lume nya ilehi ilehi lenu utu-rwu o-hih ekpe ole ká Oheh Oluhyeh ka chi ongiri ebi-ebi nya Krayist eheh me.

## ONU OMIMI HA ANGILE KÁ IMAYE KAA WE CHAA OGWU

Saji, o-bwuh la ole ká Krayist oowa ayidang wari kaka ye akama odeheh ole, bala o-la imaye la dati dati lala ahi anginyi eheh ikila wuuh a duh koowa ayidang jé la ongiri, juwa da angile wuuh ki jih epwu nya omaye olinyinyi ubwo mí lele.  
—Ala-Hiburuh 2:18

Ó rih kanu mi ho inyi le, aale, Oheh Oluhyeh Adida nya okpunyih ayidang ka kwurwu oheh onyobih cheechee hanu, duh kanu ka jé-e juwa kpa eta riroo u-uhyeh mí le. Ká onahi nya Ongolahi Jisos Krayist a juwa tanu me.  
—Ala-Rom 16:20

Akama nya olabwela onyiila lume. Ma, Ongolahi la kaa gboo kpeheh bwuh epwu nyaa wuuh. —Ejih Onyiila 34:19

Uka ole ká wee ka bwuh epwu nya enyih otuka nya akama oyeye, M ka juwa tang. Uka ole ká wee ka bwuh epwu nya ihwuh, á ka bih enyih u-uwa ka. Uka ole ká ka je bwuh epwu nya ilah, ilah á ka báng, lee, o-rwung ka, leeh, elele ilah oowa owurwu u-uhyeh nyang ka.  
—Ayisaya 43:2

Ahi jé yekee, ang mí ang wuuh kaa ho ukwurwo tuchawu-le nya ohiigwuh ha bwuh la ongiri nya Oheh Oluhyeh e-ega nya angile wuuh ká Oheh Oluhyeh ayidang há, ki rih angile ká Oheh Oluhyeh beh eko wurwu ki ka rih anginyi nya ilomwu, jaabwo ká obih omemeh nyamwu la.  
—Ala-Rom 8:28

Anu woh me! Omaye nya ang onyobih ohoho ololohe á ka jé-e we chinu ogwu, ole ko lala inya anginyi nya Oheh Oluhyeh ikila ka le ka. Saji jaabwo ká Oheh Oluhyeh ayidang rih ongo chila o-hwuh okiletu ha lume le, ó ka mi-i ya ega da ha uma nya omaye o-ka kilaanu kila, yah, nyi we chinu ogwu me, kpongh kpongh ka. Ma, uka nya omaye olinyi wuuh, Oheh Oluhyeh ka ya ongiri nyamwu bala ugboduh ojwujwuh hanu, bala o-ka me ugbeyi ole kanu ka jé-e bwuh beh hih omaye oowa jeenu inyinyi.

—I Ala-Korinti 10:13

## ONU OMIMI HA ANGILE KI KA LA OKWURWU KWURWU

Ong mí ong ole ko ka la okwurwu kwurwu bwuh epwu nya uyah omama saji nya omimi olala nyamwu le, aale, ongoowa, m ka ho ko ka rih ojekpa o-wuh ubeh igogo otuka nya Oheh Oluhye nyam kpa lele. Saji ká ongoowa á tutum ka jé-e gba kpeheh hih ubeh igogo otuka oowa kpong kpong kaka. U-uhye nya ongoowa, m ti ka da enyi nya Oheh Oluhye nyam ba, bala o-da enyi nya epweji nya Oheh Oluhye nyam ole ko rih Jerusalem onyeewe, ole ko juwa ka hireji bwuh ega nya Oheh Oluhye nyam bwuh epwoheh ba lele. M ka da enyi onyeewe nya ilom ba ongoowa inyinyi!

—Owurwu Wurwu 3:12

Ong mí ong ole ko la okwurwu kwurwu bwuh epwu nya uyah omama nya omimi olala nyamwu le, aale, ongoowa, m ka ya awurwu onyoowurwuh okerih kerih nya abwela onyiila nyam kwurwu titi lele. Aale, m ka yile enyi nya ongoowa hih epwu nya upwu nya ohihi nya Oheh Oluhye kpong kpong kaka. Aale, enyi nya ongo olinyi, m ka yah da odeheh hiigwuh hiigwuh i-ilahi nya Oheh Oluhye Adam bala i-ilahi nya alegwuh erwu nyamwu inyinyi lele.

—Owurwu Wurwu 3:5

Ong mí ong ole ko la okwurwu kwurwu bwuh epwu nya uyah omama nya omimi olala nyamwu le, aale, ongoowa, m ka ya ongiri ha ko ka bá hwuhwu u-uhye nya echi adirahwu nyam tam, jaabwo kaam ayidang la okwurwu kwurwu kpa wuh lee, duh kam rwu kaka hwuhwu ta Oheh Oluhye Adam u-uwa u-uhye nya echi adirahwu nyamwu too lee inyinyi.

—Owurwu Wurwu 3:21

Ong mí ong ole ko la okwurwu kwurwu bwuh epwu nya uyah omama saji nya omimi olala nyamwu le, aale, ongoowa ka rih ugwuh nyam tam. Aale, m ti ka rih Oheh Oluhye nya ongoowa. Aale, ongoowa ti, ti ti ka rih onyi nyam Am Oheh Oluhye le.

—Owurwu Wurwu 21:7

# **OHEH OLUHYEH JUWA YAH ELA TAHI E-EPWU NYA AHWU BALA ORWU OPWAPWA**

**I Ala-Korinti 7:10, 11**

Ehileh ole juwa hanu anu angi yeh awule kpa e-epwa. Ma, e-ehileh nya ilom ti ka. Inya Ongolahi ayidang inyi! Ó chila ká ahwu ololohe ka pwa orwu nyamwu kpong h kpong h ka. Onyang ahwu onyi ko ti pwa orwu nyamwu eneh le, aale, onyang oowa a rwu kaka rwo orwu okila kaka. O hwuhwu e-ejih ching piih me. Ó rih inyi kaka le, aale, o tiri ekpe kaka ho okpunyih bala orwu onyogoh nyamwu ki rwurwo awule mími me. Orwu-ahwu ololohe a ti pwa ahwu nyamwu kaka inyinyi.

**Ala-Rom 7:2, 3**

Ang o-jwuh ejee nya oowa rih-ekke, ehileh kaa wuh onyang ahwu kpa e-ekpelejih nya orwu nyamwu, jaabwo mí abwo ká orwumwu oowa á rih eheh kaka ba odeheh ole. Ma, ó ti rih ká orwu-ahwu oowa á gbuh eneh le, aale, ehileh ololohe á kaa wuh onyang oowa kpa e-ekpelejih nya orwumwu oowa ole ko gbuh tutum kaka. Inyinyi, o ka la le, ó rih ká ahwu oowa, á ti wulejih rwu kaka rwo orwu okila luka ole ká orwu nya ogbanye nyamwu á gbuh leka, aale, ehileh nya uya ohoho wuh onyang oowa le. Ma, ó ti rih ká orwumwu á gbuh eneh le, aale, onyang oowa gbochoh bwuh epwu nya ehileh oowa le, ó rih ko rwo orwu okila rworwo luka oowa, aale, ejeh nya uya ohoho á ke jé-e wuh oo kaka.

**Matiyu 5:32**

Ma, am kpakpakpa jam binuh yekee, orwu-ahwu onyi mí onyi ole ko pwa ahwu nyamwu le, aale, oleng oowa a wee duh ahwu nyamwu oowa erwu keleh kaka ho uya lele, ko rih ká uya ohoho á rih abwela ohoho nya ahwumwu oowa eneh ka. Oleng onyi mí onyi ole ko keleh kaka yeh ahwu ole ki pwapwa inyi le, aale, uya a we ká oleng oowa ho inyinyi lele.



## O-MWU EKPE WE ODEHEH OLE UKA O-HIH EKPE NYA JISOS KRAYIST

Jon 14:3

Uka kam rwu keleh kaka nwula iwesh ahwurwu oowa no gbenuh kpá, m juwa ka mwu ekpe wari kaka yenuh kpa rwu ba ilom, saji, ega ole kaam ayidang jih u-uwa piih, anu ka jih tam inyinyi le.

Owurwu Wurwu 3:11

Anu woh me! M juwa ka wari ahyaahi le! Saji nya oowa le, anú-u juwa yubwo chi ang onyiila nyanu ole kanu la we kpa u-uwa gogoh me. Saji ká ongongohe á ka nunuh iwesh ahwurwu nya okwurwu kwurwu nya o-ka yeh okpoh okwurwu egbejwuh nya ohihi nyanu owe kpongh kpongh kaka me.

Mak 8:38

Saji, ong mí ong ole ko ka juwa jwuh oyih nya o-yah ilomwu da odeheh lala ongo jih oyeh nyam bala erwu onyiila nyam ole, ám odeheh onyobih ole, ká anginyi ilepwu nyamwu jam jih ekpe da Oheh Oluhyeh jaabwo ká onyang ahwu o-chi la o-hwuh okiletu ha-ka, kaa ho uya ba orwumwu, aale, am ayidang titi ka jwuh oyih nya o-yah ongoowa da odeheh lala onginyi nyam, uka ole kaam Onyi nya onginyi eheh ole ka mwu ogile wari la ogboh nya Adam bala alegwuh erwu igogo nyamwu.

Matiyu 24:30

Uka oowa, ang o-jwuh ejee nya owewe nyam am Onyi nya onginyi eheh ole a ka hih eheh u-uhyeh nya egbamwu lele. Uka oowa, aluma mi uma nya odeheh ole wuuh ka juwa ba idah. Iwa ayidang wuuh ka juwa kpa ehi nya ilaa ye Onyi nya onginyi eheh ole ayidang, luka ole ko ka hih eheh u-uhyeh nya egbamwu la ongiri bala ebi-ebi otuka otuka nyamwu.

Jemsi 5:8

Le, anú-u titi juwa jwuh ugboduh tata, kanu mi ká omimi okiletu nyanu a la kpakpa inyinyi me, saji uka nya owewe nya Ongolahi la jwuh chwee lume le.

## O-MWU EKPE WE ODEHEH OLE UKA O-HIH EKPE NYA JISOS KRAYIST

Anu angi hám há, leele le, ahi rih anyi nya Oheh Oluhyeh inyilehi le. Ma, jaabwo kahi ka la luka oowa kpangga le, i choo eheh mejechi leka, Ang ole kahi jé rih-ekée, jaabwo ká Krayist ayidang la kpangga, ahi titi ka la inyinyi luka ole ká Krayist ka mwu ogile wari lele. Saji, uka oowa, ahi ka juwa kpa ehi nyahi ya jaabwo ká Krayist la kpangga le.

—I Jon 3:2

Omih ohe yah ela bwuh epwoohéh yekee, Anu woh me! Am Ongolahi juwa ka wari luka o-bwuh anginyi agaga lala oloyih ole ko kaa bwuh ayidepwa agaga le! Ahi owawa ka juwa ha ongole ko juwa kpahi jwuh awurwu okwurwu kwurwu nyanwu ole ko rih abwela onyiila nya Oheh Oluhyeh ohoho, saji ká ongoowa ka jé-e juwa lohi lohi i-ilahi nya Oheh Oluhyeh kaka.

—Owurwu Wurwu 16:15

Saji nya oowa le, o chila kaanu ayidang ka juwa nwula il-onu no girih girih, saji uka ole kanu meh iryah kponggh kponggh ka, Onyi nya onginyi eheh a ka tiri ekpe wari lele.

—Luk 12:40

Inyi, alegwuh erwu iiwa a bih alirwuh nya anginyi iiwa yekee, Anu aleng nya Galilih eeh, i-iye a tí duh kanu godayi riri, jam yoyi keleh ka epwoohéh inyi? Anu woh me! Jaabwo kanu kpa ehi nya ilonu ye jaabwo ká Oheh Oluhyeh hwuh Jisos kpa rwu lahi lahi keleh ka epwoohéh gedeh gedeh bwuh epwariri nyanu ale wee, inyinyi, Jisos oowa a titi ka tiri ekpe bwuh epwoohéh wari we odehéh ole gedeh gedeh la anginyi eheh titi ka jé-e kpa ehi nya ilaa yoo e-ehi luka oowa i-ilahi lele.

—Ukwurwo Nya Alerwu 1:11

Saji, am Onyi nya onginyi eheh ole ayidang, juwa ka mwu ekpe wari la ogboh nya Oheh Oluhyeh Adam bala alegwuh erwu, nya o-ka wari kaka nwu ong mí ong urih nya abwela ile wuuh, ká ongongoonwu jam ho odehéh ole le!

—Matiyu 16:27

# ELE NYA OHEH OLUHYEH

Luk 21:33

Uhyeh-ogba nya epwoohéh bala odehéh ole ka chipwurwu mí wee. Ma, ela olonu nyam am ayidang á ti ka chipwurwu kpá enenehe kaka.

Matiyu 22:29

Jisos we bih aa yekee, Anu ayidang a la iryah okpakpakpa saji nya Oheh Oluhyeh ka. Saji ánú jé etuh nya ingiile ki da u-Upwu Igogo yeeyee kponggh kponggh ka. Leeh, ánú jé jaabwo ká ongiri otuka nya Oheh Oluhyeh kaa bwuh ho ukwurwo kponggh kponggh ka inyinyi.

II Pita 1:21

Saji omwu oyeye nyaa ololohe á bwuh la iryah omemeh nya alomwu iiwa ayidang la ilaa kponggh kponggh ka. Ma, i yomwu iiwa wuuh da odehéh, jaabwo ká Olegwuh Igogo nya Oheh Oluhyeh juwa kpaa yah kemh.

II Timoti 3:16

Oheh Oluhyeh a kpa anginyi eheh bwuh la Olegwuh Igogo nyamwu da ela mí ela olepwu nya Upwu Igogo le. Upwu Igogo oowa jwuh apyobwunah nya o-kpa me ela je onginyi eheh, bala o-kpa bwurwuh ohobiri nyamwu da odehéh jeh oo, bala o-kpa nwu onginyi riri, bala o-kpa me ela je onginyi e-pwu nya abwela onyiila ohoho nya Oheh Oluhyeh inyinyi.

Ejeh Onyiila 119:11

Ela nyang Ahwu Oheh Oluhyeh, m hwuh kpu ibaa e-pwu nya okiletu nyam saji kam ka ho ohobiri báng ka le.

Ejeh Onyiila 119:105

Ela nyang Ahwu Oheh Oluhyeh rih otinikah ha ata nyam, o ti rih ahigbooh ha ugbeyi obwubwuh nyam inyinyi.

Published in numerous languages by World Missionary Press as God supplies funds in answer to prayer. If you would like more copies for careful distribution, please write in English to:

**World Missionary Press, Inc.  
P.O. Box 120  
New Paris, IN 46553-0120 USA**

Watson Goodman a goh ala ile  
tu gwurwuh lala upwu la Ubekeeh le.

Ogahi inyi — Anu ya ra ka.